

摘藻堂四庫全書薈要

集部

欽定四庫全書薈要

集部

漢魏六朝百三家集卷八十六

詳校官候選知縣臣吳甸華



欽定四庫全書薈要卷一萬九千六百七十七

集部

漢魏六朝百三家集卷八十六

明 張溥 輯

江淹集

樂府

銅爵妓

武皇去金閣英威長寂寞雄劍頓無光雜佩亦銷鑠秋
至明月圓風傷白露落清夜何湛湛孤燭映蘭幕撫影

愴無從惟懷憂不薄瑤色行應罷紅芳幾為樂徒登歌
舞臺終成螻蟻郭

採菱曲

秋日心容與涉水望碧蓮紫菱亦可採試以緩愁年參
差萬葉下泛漾百流前高彩隘通壑香氣麗廣川歌出

櫂

一作趙

女曲儻入江南絃乘黿非逐俗駕鯉乃懷仙衆

美信如此無恨在

一作出

清泉

齊籍田樂歌二首

永明四年籍田
詔江淹造歌

迎送神升歌

羽鑾從動金駕時遊教騰義鏡樂綴前修率先丹藕躬
遵綠疇靈之聖之歲殷澤柔

饗神歌

瓊罕既飾繡簋以陳方變嘉種永毓宵民

牲出入歌

祝詳史具禮備樂薦有牲在陳有鼓在懸騰燭象星奔
水類電郊燎夙戒馭彼乘駟以伺質明以佇神晏

薦豆呈毛血歌辭

時恭時祀有物有則伊我上聖實抱明德犧象交陳鬱
尊四塞黍惟嘉穀酒惟玄默薦通蒼祇慶覃黎黑願靈
之降祚我祐國

奏宣列之樂歌舞

殷宗配天周尊明祀瑞合汾陰慶同泰時青幕雲舒丹
殿霞起二曜惟新五精告始于以享之景福是履

齊鳳皇銜書伎辭

宋世有此辭齊初
詔中書郎江淹改

皇齊啟運從瑤璣靈鳳銜書集紫微和樂既洽神所依
超商卷夏耀英輝永世壽昌聲華飛

詩

侍始安王石頭

緒官承盛世逢恩侍英王結劔從深景撫袖逐曾光暮
情鬱無已流望在川陽平原忽超遠參差見南湘何如
塞北陰雲鴻盡來翔擊鏡照愁色徒坐隱憂方山中如
未夕無使桂葉傷

從征虜始安王道中

乘笏從帷幕反身豫休明君子未獲晏小人亦自營結
軒首涼野驅馬徠寒城容裔還鄉權逶迤去國旌山氣
亘百里山色與雲平喬松日夜竦紅霞旦夕生徒慙恩
原槩空抱春施名仰願光威遠歲晏返柴荆

從冠軍建平王登廬山香鑪峯

廣成愛神鼎淮南好丹經此山具鸞鶴往來盡仙靈瑤
草正翕翹玉樹信蔥青絳氣下縈薄白雲上杳冥中坐

瞰蜿蜒俛伏視流星不尋遐恠極則知耳目驚日落長
沙渚曾陰萬里生籍蘭素多意臨風默含情方學松栢
隱羞逐市井名幸承光誦末伏思託後旌

從建平王遊紀南城

恭承此嘉惠末官至南荆歛衽依光彩端笏奉仁明再逢
綠草合重見翠雲生江甸知禮富漢渚聞教清君王澹以
思樹羽望楚城年積衣劒滅地遠宮館平錦帳終寂寞綵
瑟秘音英丹砂信難學黃金不可成遷化每如茲安用貴

空名流巖慘中懷凝意方自驚願借若木景長照憂人情

望荆山

奉義至江漢始知楚塞長南關繞桐栢西嶽出魯陽寒
郊無留影秋日懸清光悲風撓重林雲霞肅川漲歲晏
君如何零淚霑衣裳玉柱空掩露金尊坐含霜一聞苦
寒奏再使豔歌傷

步桐臺

客子畏霜雪憂至竟悠哉綺帷生網羅寶刀積塵埃思

君出漢北鞍馬登楚臺歲綵合雲光平原秋色來寂聽
積空意凝望信長懷蕙芬自有美光景詎徘徊山中忽
緩駕暮雪將盈階

秋至懷歸

悵然集漢北還望岨山田汙汙百重壑參差萬里山楚
關帶秦隴荆雲冠吳烟草色斂窮水木葉變吳川秋至
帝子降客人傷嬋娟試訪淮海使歸路成數千逢驅未
止極旌心徒自懸若華想無慰憂至定傷年

渡西塞望江上諸山

南國多異山，禿樹共冬榮。
潺湲夕澗急，嘈囀晨鷗鳴。
石林上參錯，流沫下縱橫。
松氣鑑青藹，霞光鑠丹英。
望古一凝思，留滯桂枝情。
結友愛遠岳，採藥好長生。
當畏佳人晚，秋蘭傷紫莖。
海外果可學，歲暮誦仙經。

赤亭渚

吳江泛丘墟，饒桂復多楓。
水夕潮波黑，日暮精氣紅。
路長寒光盡，鳥鳴秋草窮。
瑤水雖未合，珠霜竊過中。
坐識

物序晏臥視歲陰空一傷千里極獨望淮海風遠心何
所類雲邊有征鴻

渡泉嶠出諸山之頂

岑崱蔽日月左右信艱哉萬壑共馳驚百谷爭往來鷹
隼既厲翼蛟魚亦曝鰓崩壁迭枕臥嶄石屢盤迴伏波
未能鑿樓船不敢開百年積流水千歲生青苔行行詎
半景余馬以長懷南方天炎火魂兮可歸來

僊陽亭

擘淚訪亭候茲地乃閩城萬古通漢使千載連吳兵瑤
磧愛嶄峩銅山鬱縱橫方水埋金腹圓岸伏丹瓊下視
雄虹照俯看綵霞明桂枝空命折烟氣坐自驚劒逕羞
前檢岷山慙舊名伊我從霜露僕御復孤征楚客心命
絕一願聞越聲

遊黃蘗山

長望竟何極閩雲連越邊南州饒竒怪赤縣多靈仙金
峰各虧日銅石共臨天陽岫照鸞采陰谿噴龍泉殘杙

千代木廬萃萬古烟禽鳴丹壁上猿嘯青崖間秦皇慕
隱淪漢武願長年皆負雄豪威棄劍為名山況我葵藿
志松木橫眼前所若同遠好臨風載悠然

還故園

漢臣泣長沙楚客悲辰陽古今雖不舉茲理亦宜傷山
中信寂寥孤景吟空堂北地三變露南簷再逢霜竊值
寰海闢反見圭緯昌浮雲抱山川遊子御故鄉遽發桃
花渚適宿春風場紅草涵電色綠樹鏤烟光高歌僚開

國微歎依笙篳請學碧靈草終歲自芬芳

劉僕射東山集

蕭蕭雲色滋惟愛起長思喬木嘯山曲征鳥怨水湄共
惜玉樽暮願是舊集作使光陰遲紳裳視絕雲銜意方此時
誦飾江臯駕終從海濱詩

陸東海譙山集

杳杳長役思思來使情濃恒忌光氛度藉蕙望春紅青
莎被海月朱華冒水松輕風暖長嶽雄虹赫遠峰日暮

崦嵫谷參差綵雲重永願白沙渚遊行遂相從丹山有
琴瑟不為憂傷容

無錫縣歷山集

愁生白露日思起秋風年竊悲杜蘅暮擘涕弔空山落
葉下楚水別鶴噪吳田嵐氣陰不極日色半虧天酒至
情蕭瑟憑樽還惘然一聞清琴奏歔泣方留連况乃客
子念直置絲竹間

外兵舅夜集

丹林一葉舊碧草從此空烟光拂夜色華舟盪秋風斂
意悵何已極望情思中瑤瀾寂以晏若采能幾終暮心
亦誰寄江臯桂有叢

貽袁常侍

昔我別楚水秋月麗秋天今君客吳坂春色縹

一作媚春

泉幽冀生碧草沅湘含翠烟鏘鏘霞上景懣懣雲外山
涉江竟何望留滯空採蓮駐情光氣下凝怨琴瑟前珠
貝性明潤蘭玉好芳堅不以宿昔岵懷愧期暮年

古意報袁功曹

從軍出隴北長望陰山雲涇渭各異流恩情於此分故
人贈寶劒鏤以瑤華文一言鳳獨立再說鸞無羣何得
晨風起悠哉凌翠氛黃鵠去千里垂涕為報君

寄丘三公

昔我學冠劒逢君在三川何意風雨激一訣異東西
菊秀空應奪蘭芳幾時堅常恐握手畢黯如光絕天
安得明月珠擘涕寄吳山

臥疾怨別劉長史

四時煎日夜玉露催紫榮始懷未及歎春意秋方驚涼
草散螢色衰樹歛蟬聲馮景魂且謚臥堂怨已生承君
客江潭先愁鴻鴈鳴吳山饒離袂楚水多別情金堅碧
不減桂華蘭有英無輟代上朝豈惜鏡中明但見一葉
落哀恨方未平

燈夜和殷長史

冬盡綵葉暮金石亦懷傷冰鱗不能起水鳥望川梁客

子仿永夜寂寞幽意長臥歇丹丘采坐失曾泉光結眉
慘成慮銷憂非羽觴此心異可緩清芷在沅湘

贈鍊丹法和殷長史

琴高遊會稽靈變竟不還不還有長意長意希童顏身
識本爛熳光曜不可攀方驗參同契金竈鍊神丹頓捨
心知愛永卻平生歡玉牒裁可卷珠藥不盈簞譬如明
月色流采映歲寒一待黃冶就青芬遲孤鸞

從蕭驃騎新帝壘

鯢妖毀王度虹氣咀王猷上宰軫靈略宏威肅廣謀繇
嶮冒戈堞乘嶠架烽樓燕兵歌越水代馬思吳州金笳
夜一遠明月信悠悠雲色被江出烟光帶海浮開襟夾
蒼宇拓遠局溟洲折日承丹谷總駕臨青丘仄待颺霧
晏方從畎壑遊

惜晚春應劉秘書

烟景抱空意蘅杜綴幽心心憂望碧葉涵影顧青林風
光多樹色露華翻蕙陰水苔方下蔓石蘿日上尋霞衣

已具帶仙冠不待替徒為多委鬱精魄還自臨始獲瓊
歌贈一點重如金山中有襟桂玉瀝乃共斟

秋夕納涼奉和刑獄舅

蕭條晚秋景旻雲承景斜虛堂起青靄崦嵫生暮霞空
居寂以欵左右自幽歌騎星謝箕尾濯髮慙陽阿年歇
玄圃壁歲減天津波金蕭哀夜長瑤琴怨暮多四時通
信黯春風日夜過楚水徒有蘭憂至竟如何

郊外望秋答殷博士

白露掩江臯青蒲平地蕪長夜亦何際銜思久踟躕企
余重蘭貝清才富金瑜獨豔始東山擅麗終西都雲精
無永滯水碧豈暫濡屬我崑景半賞爾若光初折麻異
離羣紉蕙非索居頻贈既雅歌還懷諒短書

冬盡難離和丘長史

間居深悵悵颼寒拂中閨寶禮自千里縑書果君題山
川吐幽氣雲景抱長懷茲別亦為遠潮瀾鬱東西汀臯
日慘色桂閣猿方啼擘意誰侘傺屑涕在心乖杜衡念

無沫石蘭終不睽異總歲暮駕遊行蒼山蹊

池上酬劉記室

戚戚憂可結結憂視春暮紫荷漸曲池
臯蘭覆徑路蔥蒨亘華堂葢葢雜綺樹
為此久佇立容易光陰度水館次文羽
山葉下暝露懷賞入舊襟悅物覽新賦
惜我無雕文報章慙復素

吳中禮石佛

幻生太浮詭長思多沈疑疑思不慙炤
詭生寧盡時敬

承積劫下金光鑠海涓火宅歛焚炭藥草叵卉滋常願
樂此道誦經空山坻禪心暮不雜寂行好無私軒騎久
已訣親愛不留遲憂傷漫漫情靈意終不溜誓尋青蓮
果永入梵庭期

採石上菖蒲

瑤琴久蕪沒金鏡廢不看不見空閨裏縱橫愁思端緩
步遵汀渚揚杙泛春澗電至烟流綺水綠桂涵丹憑酒
竟一作意未悅半景方自歎每為憂見及杜若豈能寬冀

採石上草得以駐餘顏赤鯉儻可乘雲霧不復還

裸體三十首

有序

夫楚諠漢風既非一骨魏製晉造固亦二體譬猶監朱
成彩雜錯之變無窮宮商為音靡曼之態不極故蛾眉
詎同貌而俱動於魄芳草寧共氣而皆悅於魂不其然
歟至於世之諸賢各滯所迷莫不論甘而忌辛好丹而
非素豈所謂通方廣恕好遠兼愛者哉乃及公幹仲宣
之論家有曲直安仁士衡之評人立矯抗况復殊於此

者乎又貴遠賤近人之常情重耳輕目俗之恒蔽是以
邯鄲托曲於李奇士季假論於嗣宗此其效也然五言
之興諒非竄古但關西鄴下既已罕同河外江南頗為
異法故玄黃經緯之辨金碧浮沈之殊僕以為亦各具
選作
合其美兼善而已今作三十首詩數其文體雖不足品
藻淵流庶亦無乖商確云爾

古離別

遠與君別者乃至鴈門關黃雲蔽千里遊子何時還送

君如昨日簷前露已圓不惜蕙草晚所悲道里寒君在
天一涯妾身長別離願一見顏色不異瓊樹枝兔絲及
水萍所寄終不移

李都尉陵從軍

樽酒送征人踟躕在親宴日暮浮雲滋握手淚如霰悠
悠清川水嘉魴得所薦而我在萬里結友一作髮不相見
袖中有短書願寄雙飛燕

班婕妤詠扇

紈扇如團月出自機中素畫作秦王女乘鸞向烟霧彩
色世所重雖新不代故竊愁涼風至吹我玉階樹君子
恩未畢零落在中路

魏文帝曹丕遊宴

置酒坐飛閣逍遙臨華池神飈自遠至左右芙蓉披綠
竹夾清水秋蘭被幽崖月出照園中冠珮相追隨客從
南楚來為我吹參差淵魚猶伏浦聽者未云疲高文一
何綺小儒安足為肅肅廣殿陰雀聲愁北林衆賓還城

邑何用慰我心

陳思王曹植贈友

君王禮英賢不恡千金璧雙闕指馳道朱宮羅第宅從
容冰井臺清池映華薄涼風盪芳氣碧樹先秋落朝與
佳人期日夕望青閣褰裳摘明珠徙倚拾蕙若眷我二
三子辭義麗金牕延陵輕寶劒季布重然諾處富不忘
貧有道在葵藿

劉文學楨感遇

蒼蒼山中桂團團霜露色霜露一何緊桂枝生自直橘
柚在南國因君為羽翼謬蒙聖主私託身文墨職丹彩
既已過敢不自雕飾華月照芳池列坐金殿側微臣固
受賜鴻恩良未測

王侍中粲懷德

伊昔值世亂秣馬辭帝京既傷蔓草別方知杖杜情嶠
函蕩選作復丘墟冀闕緬縱橫倚棹泛涇渭日暮山河清

蟋蟀依素

選作桑

野嚴風吹枯莖鸛鷀在幽草客子淚已

零去鄉三十載幸遭天下平賢主降嘉賞金貂服玄纓
侍宴出河曲飛蓋遊鄴城朝露竟幾何忽如水上萍君
子篤恩義柯葉終不傾福履既所綏千載垂令名

稽中散康言志

曰余不師訓潛志去世塵遠想出宏域高步超常倫靈
鳳振羽儀戢景西海濱朝食琅玕實夕飲玉池津處順
故無累養德乃入神曠哉宇宙惠雲羅更四陳哲人貴
識義大雅明底身莊生悟無為老氏守其真天下皆得

一名實久相賓咸池饗爰居鐘鼓或愁辛柳惠善直道
孫登庶知人寫懷良未遠感贈以書紳

阮步兵籍詠懷

青鳥海上遊鸞斯蒿下飛浮沉不相宜羽翼各有歸飄
飄可終年沆瀣安是非朝雲乘變化光耀世所希精衛
銜木石誰能測幽微

張司空華離情

秋月映簾櫳懸光入丹墀佳人撫鳴琴清夜守空帷蘭

徑少行迹玉臺生網絲庭樹發紅彩閨草含碧滋佇
整綾綺萬里贈所思願垂湛露惠信我皎日期

潘黃門岳述哀

青春連天機素秋馳白日美人歸重泉悽愴無終畢殯
宮已肅清松柏轉蕭瑟俯仰未能弭尋念非但一撫衿
悼寂寞恍然若有失明月入綺窓髮髯想蕙質銷憂非
萱草永懷寄夢寐夢寐復冥冥何由覲爾形我慙北海
術爾無帝女靈駕言出遠山徘徊泣松銘雨絕無還雲

華落豈留英日月方代序寢興何時平

陸平原機羈宦

儲后降嘉命恩紀被微身明發眷桑梓永歎懷密親流
念辭南澁銜怨別西津驅馬遵淮泗旦夕見梁陳服義
追上列矯迹廁宮臣朱黻咸髦士長纓皆俊民契濶承
華內綢繆踰歲年日暮聊總駕逍遙觀洛川殂歿選作
徂役
多拱木宿草凌寒烟遊子易感慨躑躅還自憐願言寄
三鳥離思非徒然

左記室思詠史

韓公淪賣藥梅生隱市門百年信荏苒何用苦心魂當
學衛霍將建功在河源珪組賢君眄青紫明主恩終軍
才始達賈誼位方尊金張服貂冕許史乘華軒王侯貴
片議公卿重一言太平多歡娛飛蓋東都門顧念張仲
蔚蓬蒿滿中園

張黃門協苦雨

丹霞蔽陽景綠泉涌陰渚水鶴巢層甍山雲潤柱礎有

弇興春節愁霖貫秋序燮燮涼葉奪戾戾颼風舉高談
翫四時索居慕儔侶青苔一作苔日夜黃芳蕤成宿楚歲
暮百慮交無以慰延佇

劉太尉琨傷亂

皇晉遘陽九天下橫氛霧秦趙值薄蝕幽并逢虎據伊
余荷寵靈感激徇馳驚雖無六奇術冀與張韓遇甯戚
扣角歌桓公遭乃舉荀息冒險難實以忠貞故空令日
月逝愧無古人度飲馬出城濠北望沙漠路千里何蕭

條白日隱寒樹投袂既憤懣撫枕懷百慮功名惜未立
玄髮已改素時哉苟有會治亂惟冥數

盧郎中謚感交

大厦須異材廊廟非庸器英俊著世功多士濟斯位眷
顧成綢繆乃與時髦匹姻媾久不虧契濶豈但一逢厄
既已同處危非所恤常慕先達槩觀古論得失馬服為
趙將疆場得清謚信陵佩魏印秦兵不敢出慨無握中
策徒慙素絲質羈旅去舊京感遇踰琴瑟自顧非杞梓

勉力在無逸更以畏友朋濫吹乖名實

郭弘農璞遊仙

崦山多靈草海濱饒奇石偃蹇尋青雲隱淪駐精魄道人讀丹經方士鍊玉液朱霞入窓牖曜靈照空隙傲睨摘木芝陵波採水碧眇然萬里遊矯掌望烟客永得安期術豈愁濛汜迫

孫廷尉綽襍述

太素既已分吹萬著形兆寂動苟有源因謂殤子天道

喪涉千載津梁誰能了思乘扶搖翰卓然凌風矯靜觀
尺樗義理足未嘗少同同秋月明憑軒詠堯老浪迹無
虫妍然後君子道領畧歸一致南山有綺皓交臂久變
化傳火乃薪草疊疊玄思清胃中去機巧物我俱忘懷
可以狎鷗鳥

許徵君詢自叙

張子閤內機單生蔽外像一時排冥筌冷然空中賞遣
此弱喪情資神任獨往來藥白雲隈聊以肆所養丹葩

曜芳蕤綠竹陰間厭苔苔寄意勝不覺凌虛上曲櫺激
鮮飈石室有幽響去矣從所欲得失非外獎至哉操斤
客重明固已朗五難既灑落超迹絕塵網

殷東陽仲文興矚

晨遊任所萃悠悠蘊真趣雲天亦遼亮時與賞心遇青
松挺秀萼惠色出喬樹極眺清波深緬映石壁素瑩情
無餘淖拂衣釋塵務求仁既自我玄風豈外慕直置忘
所宰蕭散得遺慮

謝僕射混遊覽

信矣勞物化憂襟未能整
薄言遵郊衢總轡出臺省
淒淒節序高寥寥心悟永
時菊耀巖阿雲霞冠秋嶺
眷然惜良辰徘徊踐落景
卷舒雖萬緒動復歸有靜
曾是迫桑榆歲暮從所秉
舟壑不可攀忘懷寄匠郢

陶徵君潛田居

種苗在東臯苗生滿阡陌
雖有荷鋤倦濁酒聊自適
日暮巾柴車路闇光已夕
歸人望烟火稚子候簷隙
問君

亦何為百年會有役但願桑麻成蠶月得紡績素心正
如此開逕望三益

謝臨川靈運遊山

江海經邅迴山嶠備盈缺靈境信淹留賞心非徒設平
明登雲峰杳與廬霍絕碧障長周流金潭恒澄徹洞林
帶晨霞石壁映初晰乳竇既滴瀝丹井復寥泝品壑轉
奇秀岑峯還相蔽赤玉隱瑤溪雲錦被沙汭夜聞猩猩
啼朝見鼯鼠逝南中氣候暖朱華凌白雪幸遊建德鄉

觀竒經禹穴身名竟誰辨圖史終磨滅且泛桂水潮映
月遊海滌攝生貴處順將為智者說

顏特進延之侍宴

太微凝帝宇瑤光正神縣揆日粲書史相都麗聞見列
漢構仙宮開天製寶殿桂棟留夏飈蘭橈停冬霰青林
結冥濛丹嶽被

五臣作披

蔥蒨山雲備卿霽池卉具靈變重

陽集清氛下輦降玄宴驚望分寰遂曠盡都甸氣生
川嶽陰烟滅淮海見中坐溢朱組步欄筵瓊弁禮登佇

睿情樂閑延皇眄測恩躋愉逸
汭牒情浮賤承榮重兼

金

李善作榮重
魏兼金

巡華過盈瑱敢飾輿人詠方慙淶水薦

謝法曹惠連贈別

昨發赤亭渚今宿浦陽汭方作雲峰異豈伊千里別芳

塵未歇席零

李善作零

淚猶在袂

入聲

停艫望極浦弭棹阻風

雪風雪既經時夜永起懷思汎濫北湖遊茗

李善作茗

亭南

樓期點翰詠新賞開袞瑩所疑摘芳愛氣馥拾蕊憐色

滋色滋畏沃若人事亦銷鑠子衿怨勿往谷風誚輕薄

共秉延州信無慙仲路諾靈芝望三秀孤筠情所託所
託已殷勤祇足攬懷人今行嶠嶮外銜思至海濱覲子
杳未偈欸睇在何辰雜珮雖可贈疏華竟無陳無陳心
惛勞旅人豈遊遨幸及風雪霽青春滿江臯解纜候前
侶還望方鬱陶烟景若離遠未響寄瓊瑤

王徵君微養疾

窈靄瀟湘空翠澗澹無滋寂歷百草晦歛吸鷗雞悲清
陰往來遠月華散前墀鍊藥矚虛幌汎瑟臥遙帷水碧

驗未黷金膏靈詎溜北渚有帝子蕩漾不可期悵然山
中暮懷痾屬此詩

袁太尉淑從駕

宮廟禮哀敬粉色道嚴玄恭潔由明祀肅駕在祈年詔
徒登季月戒鳳藻行川雲旆象漢徒宸網擬星懸朱櫂
麗寒渚金鏐映秋山羽衛藹流景綵吹震沉淵辨詩測
京國履籍鑒都鄺毗謠響玉律邑頌被丹絃文軫薄桂
海聲教燭氷天和惠頒上笏恩渥浹下筵幸侍觀洛後

豈慕巡河前服義方無沫展歌殊未宣

謝光祿莊郊遊

肅舫出郊際徒樂逗江陰翠山方藹藹青浦正沈沈涼
葉照沙嶼秋榮冒水潯風散松架險雲鬱石道深靜默
鏡縣野四睇亂層岑氣清知鴈引露華識猿音雲裝信
解散烟駕可辭金始整丹泉術終覲紫芳心行光自容
裔無使弱思侵

鮑參軍昭戎行

豪士枉尺壁宵人重恩光徇義非為利執羈輕去鄉孟
冬郊祀月殺氣起嚴霜戎馬粟不煖軍士冰為漿晨上
城臯坂磧礫皆羊腸寒陰籠白日大谷晦蒼蒼息徒稅
征駕倚劒臨八荒鷓鴣不能飛元武伏川梁鍛翮由時
至感物聊自傷豎儒守一經未足識行藏

休上人怨別

西北秋風至楚客心悠哉日暮碧雲合佳人殊未來露
彩方泛艷月華始徘徊寶書為君掩瑤瑟詎能開相思

巫山渚悵望陽雲臺膏鑪絕沈燎綺席生浮埃桂水日
千里因之平生懷

學魏文帝

西北有浮雲繚繞華陰山惜哉時不遇入夜值霜寒秋
風聒地起吹我至幽燕幽燕非我國窈窕為誰賢少年
歌且止歌聲斷客子

效阮公詩十五首

歲暮懷感傷中夕弄清琴戾戾曙風急團團明月陰孤

雲出北山宿鳥驚東林誰謂人道廣憂慨自相尋寧知
霜雪後獨見松竹心

十年學讀書顏華尚美好不逐世間人鬪雞東郊道富
貴如浮雲金玉不為寶一旦鷄鳴嚴霜被勁草志氣
多感失淚下沾懷抱

白露淹庭樹秋風吹羅衣忠信主不合辭意將訴誰獨
坐東軒下雞鳴夜已晞總駕命賓僕遵路起旋歸天命
誰能見人蹤信可疑

飄飄恍惚中是非安所之大道常不驗金火每如斯恍
慨少淑貌便娟多令辭宿昔秉心誓靈明將見期願從
丹丘駕長弄華池滋

陰陽不可知鬼神惟杳冥暫試武帝貌一見李后靈同
情淪異物有體入無形賢聖共草昧仁智焉足明變化
未有極恍惚誰能精

若木出海外本自丹水陰羣帝共上下鸞鳥相追尋千
齡猶旦夕萬世更浮沉豈與異鄉士瑜瑕論淺深

夏后乘兩龍高會在帝臺榮光河雒出白雲蒼梧來侍
御多賢聖升降有羣才四時有變化盛明不徘徊高陽
邈已遠竚立誰語哉

昔余登大梁西南望洪河時寒原野曠風急霜露多仲
冬正慘切日月少精華落葉縱橫起飛鳥時相過搔首
廣川陰懷歸思如何常願反初服閒步潁水阿

宵月輝西極女主映東海佳麗多異色芬葩有奇采綺
縞非無情光陰命誰待不與風雨變長共山川在人道

則不然消散隨風改

少年學擊劍從師至幽州燕趙兵馬地唯見古時丘登
城望山水平原獨悠悠寒暑有往來功名安可留

擾擾當途子毀譽多埃塵朝生輿馬間夕死衢路濱藜
藿應見棄勢位乃為親華屋爭結綬朱門競彈巾徒羨
草木利不愛金碧身至德所以貴河上有丈人

華樹曜北林芬芳空自宣秋至白雲起蟋蟀號庭前中
心有所思虛堂獨浩然安坐詠琴瑟逍遙可永年

假乘試行遊北望高山岑翩翩征鳥翼蕭蕭松柏陰感
時多辛酸覽物更傷心性命有定理禍福不可禁唯見
雲際鵠江海自追尋

夕雲映西山蟋蟀吟桑梓零露被百草秋風吹桃李君
子懷苦心感慨不能止駕言遠行遊驅馬清河涘寒暑
更進退金石有終始光色俯仰間英艷難久恃

至人貴無為裁魂守寂寥唯有馳騫士風塵在一朝輿
馬相跨躍賓從共矜驕天道好盈缺春華故秋凋不知

北山民商歌弄場苗

就謝主簿宿

季月寒氣重滋蘭錯無芳
北方漂夜色河凝暘如霜
悵哉心神晚燭滅此深堂
芟衣如可贈寧濕岵雲梁

無錫舅相送銜涕別

心遠路已迴意滿辭未陳
曹風漂別蓋北雲竦征人
杯酒憐歲暮志氣非上春
若無孤鳥還瀝泣何所因

當春四韻同

闕

左丞

雷萌山中草雲照江上花流烟漾璇景輕風泛流霞我
有幽蘭念銜意矚里斜友人殊未還獨慰簷前華

感春冰遙和謝中書二首

江臯桐始華斂衣望邊亭平原何寂寂島暮蘭紫莖芬
披好草合流爛新光生冰雪徒皦潔此焉空守貞
暮意歌上眷悵哉望佳人擘洲之宿莽命為瑤桂因觀
書術不變學古道恒真若作商山客寄謝丹水濱

詠美人春遊

江南二月春東風轉綠蘋不知誰家子看花桃李津白
雪凝瓊貌明珠點絳唇行人咸息駕爭擬洛川神

征怨

蕩子從征久鳳樓簫管閒獨枕凋雲鬢孤燈損玉顏何
日邊塵淨庭前征馬還

清思詩

趙后未至麗陰妃非美極情理儻可論形有焉足識帝
女在河洲晦映西海側陰陽無定光襍錯千萬色終歲

如瓊草紅華長翕艷

師曠操雅操延子聆竒音元鶴徒翔舞清角自浮沈明
瑄東南逝精絲西北臨白雲瑤池曲止一作上使淚淫淫

秋夜紫蘭生湛湛明月光偃蹇靈芝采容裔紫華堂林
木不拂蓋淇水寧漸裳倏忽南江陰照曜北海陽從此
長往來萬世無感傷

白露滋金瑟清風蕩玉琴空閨饒遠念虛堂生夜陰茲
夕一何哀明月沒西林世人重時暮道士情亦深願乘

青鳥翼徑出玉山岑

至德不可傳靈龜不可侶草木還根蒂精靈歸妙理我
學杳冥道誰能測窮已須待九轉成終會長沙市

傷內弟劉常侍

金壁自蕙質蘭杜信嘉名丹綵既騰迹華萼故揚聲伊
余方罷秀歎息向君榮誰疑春光是何遽秋露輕遠心
惜近路促景怨長情風至衣袖冷况復蟋蟀鳴白露泫
漢沼明月空漢生長悲離短意惻切吟空庭注歆東郊

外流涕北山垆

悼室人十首

佳人永暮矣，隱憂遂歷茲。
寶燭夜無華，金鏡晝恒微。
桐葉生綠水，霧天流碧滋。
蕙弱芳未空，蘭深鳥思時。
湘醺徒有酌，意塞不能持。

適見葉蕭條，已復花菴鬱。
帳裏春風盪，簷前還燕拂。
垂涕視去景，摧心向徂物。
今悲輒流涕，昔歡常飄忽。
幽情一不弭，守歎誰能慰。

夏雲多襍色紅光鏘襲鮮
苒弱屏風草潭拖曲池蓮黛
葉鑑深水丹華香碧烟臨綵
方自弔擘氣以傷然命知
悲不絕恒如注海泉

駕言出遊行冀以滌心胃
復值烟雨散清陰帶山濃素
沙匝廣岸雄虹冠尖峰出風
舞森桂落日暖圓松還結
生不念楚客獨無容

秋至擣羅紈淚滿未能開
風光肅入戶月華為誰來結
眉向珠網瀝思視青苔
髮局將成葆帶減不須摧我心

若涵烟益益滿中懷

窓塵歲時阻閨無日夜深流黃夕不織寧聞梭杼音涼
靄漂虛座清香盪空琴蜻引知寂寥蛾飛測幽陰乃抱
生死悼豈伊離別心

顥顥氣薄暮較較清衾單階前水光裂樹上雪花團庭
鶴哀以立雲雞肅且寒方東有苦淚承夜非膏蘭從此
永黯削萱葉焉能寬

杼悲情雖滯送往意所知空座幾時設虛帷無久垂暮


氣亦何勁嚴風照天涯夢寐無端際微恍有分離意念
每失乖徒見四時虧

神女色嬌麗乃出巫山湄逶迤羅袂下鄣日望所思佳
人獨不然戶牖絕錦綦感此增嬋娟屑屑涕自滋清光
澹且減低意守空帷

二妃麗瀟湘一有乍一無佳人承雲氣無下此幽都當
追帝女迹出入泛靈輿掩映金淵側遊豫碧山隅曖然
時將罷臨風還故居



漢魏六朝百三家集卷八十六



總校官庶吉士臣侍朝

校對官編修臣范衷

謄錄監生臣劉書

欽定四庫全書薈要

集部

漢魏六朝百三家集卷八十七上



詳校官候選知縣臣吳甸華

欽定四庫全書薈要卷一萬九千六百七十八

集部

漢魏六朝百三家集卷八十七上

明 張溥 輯

沈約集一

賦

郊居賦

惟至人之非已固物我而兼忘自中智以下泊咸得性
以為場獸因窟而獲騁鳥先巢而後翔陳巷窮而業泰

嬰居湫而惠昌僑棲仁於東里鳳晦迹於西堂伊吾人之褊志無經世之大方思依林而羽戢願託水而鱗藏固無情於輪奐非有欲於康莊披東郊之寥廓入蓬藿之荒茫既從堅而橫構亦風除而雨攘昔西漢之標季余播遷之云始達利建於海昏創惟衆於江汜同河濟之重世踰班生之十紀或辭祿而反畊或彈冠而來仕逮有晉之隆安集艱虞於天步世交爭而波流民失告而狼顧延亂庥於井邑曝如莽於衢路大地曠而靡容

昊天遠而誰訴伊皇祖之弱辰逢昔艱之孔棘違危邦
而窘驚訪安土而移卽肇胥宇於朱方掩閒庭而宴息
值龍顏之鬱起乃憑風而矯翼指皇邑而南轅駕修衢
以騁力遷華靡而來啓張高衡而徙植傍逸陌之修平
面淮流之清直芳塵浸而悠遠世衡忽其宏隆綿四代
於茲日盈百祀於微躬嗟弊廬之難保若實籙之從風
或誅茅而剪棘或既西而復東乍容身於白社亦寄孳
於伯通迹平生之耿介實有心於獨往思幽人而軫念

望東臯而長想本忘情於狗物徒羈紲於天壤應屢歎
於牽絲陸興言於世網事滔滔而未合志惛惛而無爽
路將殫而彌峭情薄暮而踰廣抱寸心其如蘭何斯願
之浩蕩詠歸歟而躑躅眷巖阿而抵掌逢昔君之喪惠
何凶昏之孔熾乃戰牧所未陳實升陟所不記彼黎元
之喋喋將垂獸而為餌瞻窮昊而無歸雖非牢而被馘
始歎絲而未覩終迫組而後值尋貽愛乎上天固非民
其莫甚授冥符於井翼寔靈命之所稟當降監之初辰

值積惡之云稔寧方割於下墊廓重氛於上塲躬靡暇
於朝食常求衣於夜枕既牢籠於媯夏又馳驅乎軒頊
惠無遠而不被明無微而不燭鼓玄澤於大荒播仁風
於遐俗闢終古而遐念信王猷其如玉值銜圖之盛世
遇興聖之嘉期謝中涓於初日叨光佐於此肯闕投石
之猛志無飛矢之麗辭排陽烏而命邑方河山而啓基
翼儲光於三善長王職於百司兢鄙夫之易失懼寵祿
之難持伊前世之貴仕罕紆情於丘窟譬叢華於楚趙

每驕奢以相越築甲館於銅駝並高門於北闕闢重局
於華閭豈蓬蒿所能沒教傳嗣於境壤何安身於窮地
味先詰而為言固余心之所嗜不慕權於城市豈邀名
於屠肆詠希微以考室幸風霜之可庇爾乃傍窮埜抵
荒郊編霜莢葺寒茅構棲噪之所集築町疇之所交因
犯檐而刊樹由妨基而剪巢決渟滲之汀澹塞井甃之
淪坳菽芳枳於北渠樹脩楊於南浦遷甕牖於蘭室同
肩墻於華堵織宿楚以成門藉外扉而為戶既取陰於

庭樾又因籬於芳杜開閣室以遠臨闕高軒而旁覩漸
沼止於雷垂周塍陌於堂下其水草則蘋萍芡芰菁藻
蒹菰石衣海髮黃荇綠蒲動紅荷於輕浪覆碧葉於澄
湖飡嘉實而却老振羽服於清都其陸卉則紫萼綠葍
天著山韭鴈齒麋舌牛脣蘋首布蕋南池之陽爛熳北
樓之後或纂渚而北地或縈窻而窺牖若乃園宅殊製
田圃異區李衡則橘林千樹石崇則棣果萬株竝豪情
之所侈非儉志之所娛欲令紛披蓊鬱吐綠攢朱羅窻

映戶接雷承隅開丹房以四照舒翠葉而九衢抽紅英
於紫蒂銜素葉於青跗其林鳥則翻泊頡頏遺音下上
楚雀多名流嚶襍響或班尾而綺翼或綠衿而絳顙好
葉隱而枝藏乍間闕而來往其水禽則大鴻小鴈天狗
澤虞秋鷺冬鸛修鷁短鳧曳參差之弱藻戲澆澣之輕
軀翅抨流而起沫翼鼓浪而成珠其魚則赤鯉青魴纖
儵鉅鰈碧鱗朱尾修顙偃頡小則戲渚成文大則噴流
揚白不興羨於江海聊相忘於余宅其竹則東南獨秀

九府擅奇不遷植於淇水豈分根於樂池秋蜩唵葉寒
雀噪枝來風南軒之下負雪北堂之垂訪往塗之軫跡
觀先識之情偽每誅空而索有皆指難而為易不自己
而求足並尤物以興累亦昔士之所迷而今余之所避
也原農皇之攸始討厥播之云初肇變腥以粒食乃人
命之所儲尋井田之往記考阡陌於前書顏簞食而樂
在鄭高廩而空虛頃四百而不足畝五十而有餘撫幽
衷而跼念幸取給於庭廬緯東菑之故耜浸北畝之新

渠無褰黻於曉蓐不抱怒於朝蔬排外物以齊遣獨為
累之在余安事干斯之積不羨汶陽之墟臨吳維而騁
目即堆冢而流眄雖茲山之培塿乃文靖之所宴驅四
牡之低昂響繁茄之清嘽羅方員而綺錯窮海陸而兼
薦奚一權之足偉委千金其如線試撫臆而為言豈斯
風之可扇將通人之遠旨非庸情之所見聊遷情而徙
睇識方阜於歸津帶脩汀於枉渚肇舉鍾於彊秦路縈
吳而歎越塗被海而通閩懷三鳥以長念伊故鄉之可

珍寔褰期於晚歲非失步於方春何東川之瀟瀟獨流
涕於吾人謬參賢於昔代亟徒游於茲所侍綵旄而齊
轡陪龍舟而遵渚或列席而賦詩或班觴而宴語總惟
一朝冥漠西陵忽其葱楚望商飈而永歎每樂愷於斯
觀始則鐘石鏘鉉終以魚龍瀾漫或升降有序或浮白
無算貴則邴魏蕭曹親則梁武周旦莫不共霜霧而歆
滅與風雲而消散眺孫后之墓田尋雄霸之遺武實接
漢之後王信開吳之英主指衡岳而作鎮包江漢而為

宇徒徵言於石櫛遂延災於金縷忽蕪穢而不修同原
陵之撫撫寧知螻蟻之與狐兔無論樵芻之與牧豎睇
東巘以流目心悽愴而不怡蓋昔儲之舊苑寔博望之
餘基修林則表以桂樹列草則冠以芳芝風臺累翼月
榭重栢千櫨巉巖百拱相持阜棘林駕蘭柁水嬉踰三
齡而事往忽二紀以歷茲咸夷漫以蕩滌非古今之異
昔回余眸於艮域覲高館於茲嶺雖混成以無跡寔遺
訓之可秉始食霞而吐霧終陵虛而倒景駕雌蜺之連

卷泛天江之悠永拍咸池而一息望瑤臺而高騁匪爽
言以自誇冀神方之可請惟鍾巖之隱鬱表皇都而作
峻蓋望秩之所宗含風雲而吐潤其為狀也則巍峩崇
峯喬枝拂日堯嶷峩寧墜石堆星岑崱聳岬或均或平
盤堅枕卧詭狀殊形孤登橫插洞穴斜經千丈萬仞三
襲九成亘繞州邑款跨郊坰素煙晚帶白霧晨縈近循
則一巖異色遠望則百嶺俱青觀二代之瑩兆觀推殘
之餘遂成顛沛於虐豎康歛衿於虛器穆恭已於巖廊

簡遊情於玄肆烈窮飲以致災安忘懷而受崇何宗祖
之奇傑威橫天而陵地惟聖文之續武殆隆平之可至
余世德之所君仰遺封而掩淚神寢匪一靈館相距席
布驛駒堂流桂醑降紫皇於天闕延二妃於湘渚浮蘭
煙於桂棟召巫陽於南楚揚玉桴握椒糈悅臨風以浩
唱折瓊茅而延佇敬惟空路邈遠神蹤遐濶念甚驚飈
生猶聚沫歸妙軫於一乘啓玄扉於三達欲息心以遣
累必違人而後豁或結橈於巖根或開櫓於木末室閭

蘿薦檐梢松栝既得理於兼謝固忘懷於饑渴或攀枝
獨遠或陵雲高蹈因葺茨以結名猶觀空以表號得忘
已於茲日豈期心於來報天假余以大德荷茲賜之無
疆受老夫之嘉稱班燕禮於上庠無希驥之秀質乏如
珪之令望邀昔恩於舊主重匪服於今皇仰休老之盛
則請微軀於夕陽勞蒙司而獲謝猶奉職於春坊肯言
歸於陋宇聊暇日以翱翔棲余志於淨國歸余心於衢
場獸依墀而莫駭魚叨沼而不綱旋迷塗於去轍篤後

念於徂光晚樹開花初英落葉或異林而分丹青乍因
風而襍紅紫紫蓮夜發紅荷曉舒輕風微動其芳襲余
風騷屑於園樹月籠連於池竹蔓長柯於簷桂發黃華
於庭菊冰懸堦而帶坻雪縈松而被埜鴨屯飛而不散
鴈高翔而欲下竝皆物之可懷雖外來而非假寔情性
之所留滯亦志之而不能捨也傷余情之頽暮罹憂患
其相溢非異軫而同歸懽殊方而並失皆復託情魚鳥
歸閑蓬華旁闕吳娃前無趙瑟以斯終老於焉消日惟

以天地之恩不報書事之官靡述徒重於高門之地不
載於良史之筆長太息其何言羞愧心之非一

愍塗賦

結榜窮渚思臨長嶼情依舊越身經故楚彼長路之多
端伊客心之無緒懼因循而易失悲由心而難拒此北
海之信遼知余思之方阻日掩長浦風掃聯葭疊雲凝
憤廣水騰華聽奔沸於洲嶼望掩曖乎煙沙依雲邊以
知國極鳥道以瞻家免悽愴於羈離亦殷勤於行路歎

余塗之屢蹇奚前芳之可慕

憫國賦

余生平之無立徒跣踵以自閑處圍城之慄慄得無用
於行間對僚友而不怡咸悄顏而相顧畏高衝之北擬
壯激矢之南度駭潛師之夜過驚躍馬之晨呼矛森森
而密堅旗落落而疎布時難紛其未已歲功迫其將徂
育素蟻於玄冑垂葆髮於縵胡

麗人賦

有客弱冠未仕締交戚里馳騫王室遨遊許史歸而稱
曰狹斜才女銅街麗人亭亭似月嫵婉如春凝情待價
思尚衣巾芳躑散麝色茂開蓮陸離羽珮雜錯花鈿響
羅幃而不進隱明燈而未前中步襜而一息順長廊而
迫歸池翻荷而納影風動竹而吹衣薄暮延佇宵分乃
至出閣入光含羞隱媚垂羅曳錦鳴瑤動翠來脫薄粧
去留餘膩沾粧委露理鬢清渠落花入領微風動裾

傷美人賦

信美顏其如玉咀清哇而度曲思佳人而未來望餘光
而躑躅拂螭雲之高帳陳九枝之華燭虛翡翠之珠被
空合歡之芳褥言歡愛之可永庶羅袂之空裁曾未申
其巧笑忽淪軀於夜臺伊芳春之仲節夜猶長而未遽
悵徙倚而不眠往徘徊於故處

擬風賦

若夫搖玉樹響金扉拂九層之羽蓋轉八鳳之珠旂時
卷瑤臺翠帳乍動佚女輕衣此蓋羽客之仙風也

桐賦

龍門之桐遠望青葱專巖擅嶺或孤或叢枝封暮雲葉
映晝虹抗蘭橈以棲龍拂雕窻而團露喧密葉於鳳晨
宿高枝於鸞暮合影陽崖標峯東陸俯結玄陰仰成翠
屋乍髣髴於行雨肯徘徊於丹轂遶齊綵於碧林豈慚
光於若木

高松賦

鬱彼高松栖根得地託北園於上郎依平臺而養翠若

夫蟠株聳幹之懿含星漏月之奇經千霜而得拱仰百
仞而方枝朝吐輕煙薄霧夜宿迷鳥羈雌露雖滋而不
潤風未動而先知既捎雲於清漢亦倒景於華池輕陰
蒙密喬柯布濩葉斷禽蹤枝通援路聽騷騷於既曉望
隱隱於將暮暖平湖而漾青綠拂繒綺而籠丹素於時
風急龍首寒浮塞天流蓬不息明月孤懸檀藥之竹可
詠鄒枚之客存焉清都之念方遠姑射之想悠然擢柔
情於蕙圃涌寶思於珠泉豈徒為善之小樂離繳之短

篇若此而已乎

愍衰草賦

愍衰草衰草無容色憔悴荒徑中寒茲不可識昔時兮
春日昔日兮春風銜花兮佩實垂綠兮散紅巖陬兮海
岸冰多兮霰積布綿密於寒臯吐纖疏於危石彫芳卉
之九衢實靈茅之三脊風急峭道難秋至客衣單既傷
簷下菊復悲池上蘭飄落逐風盡方知歲早寒流螢暗
明燭鴈聲斷裁續霜奪莖上紫風銷葉中綠秋鴻兮疏

引寒鳥兮聚飛徑荒寒草合草長荒徑微園庭漸蕪沒
霜露日霑衣

天淵水鳥應詔賦

天淵池鳥集水漣漪單汎姿容與羣飛時合離將騫復
歛翮迴首望驚雌飄薄出孤嶼未曾宿蘭渚飛飛忽云
倦相鳴集池籞可怜九層樓光影水上浮本來暫止息
遇此遂淹留若夫旅浴清深朋翻迴曠翠鬣紫纓之飾
丹冕綠襟之狀過波兮湛澹隨風兮迴漾竦臆兮開萍

感水兮興浪

反舌鳥賦

咨玄造之大德播含靈於無小有反舌之微禽亦班名
於庶鳥之佳容之可翫因繁聲以自表其聲也驚詭囀
喑縈紆離亂駢浮迴合品危瑣散或發曲無漸或收音
去半既含意於將曉亦流妍於始旦雜沓逶迤嚶跳參
差攢嬌動葉促轉縈枝分宮析徵萬矩千規因風起嘒
曳響生奇對芳辰於此月屬今余之遵暮倦城守之誼

疲愛田郊之間素眷春物而懷之聞好音於庭樹

詔

改天監元年恩詔

門下五精遞襲皇王所以受命四海樂推殷周所以改
物雖禪代相舛遭會異昔而微明迭用其流遠矣莫不
振民育德光被黎元朕以寡闇命不先後寧濟之功屬
當期運乘此時來同心萬物遂振厥弛維大造區夏永
言前蹤義均慙慙齊氏以代終有徵歷數云改欽若前

載集大命於朕躬顧惟菲德辭不獲命寅畏上靈用膺
景業執禋柴之禮當與能之祚繼迹百王君臨四海若
涉大川罔知攸濟洪基初兆萬品權輿思俾慶澤覃被
率土可大赦天下改齊中興二年為天監元年賜民爵
二級文武加位二等鰥寡孤獨不能自存者人穀五斛
逋布口錢宿債勿復收其有犯鄉論清議贓汙淫盜一
皆蕩滌洗除前注與之更始長從勅繫之身特皆原遣
亡官失爵禁錮奪勞一依舊典

南郊恩詔

門下卜日禋饗政道莫先厚下布澤哲王是務朕仰祇
靈眷俯臨億兆歲象迴環恭事亡及牲玉必荐感敬備
申升煙燎於穹昊致精誠於太一思霑颺潤惠茲窮生
應天監三年內犯奪勞及左降可悉原降繼市職不克
人身及家口質繫悉散還私家督備前歲三五犯譴因
及隨曹景宗授司州委叛應謫役者並量所蠲降尚書
所檢巧陳淫辭普更開恩百日各聽自首不問往罪京

師三縣尤窮之民詳加賑恤主者速條格施行

又

門下朕肅膺乾貺君臨率土雖日晏劬勞而仁恕未洽
星琯驟迴履端告始禋饗云備誠敬兼申宣和布澤情
深待旦凡内外文武可各賜勞一年叛亡未擒若百日
內自首還役不問往罪女子質繫悉且散遣文書輕重
坐罪並皆從原主者詳為條格疾速施行

又

朕昧爽夙興念茲理道而明不燭遠引之未易仰尋先
烈思致升平自頃多故戎車代有軍政國容事緒非一
刑禮參用未臻和簡向隅之情永言增歎今郊禋載洽
幽明允從思崇嘉祉被之兆庶可大赦天下主者施行
立太子恩詔

朕屬當期運係迹前王思所以長世流祚垂之萬葉百
辟咸以元良之寄有國莫先自昔哲后降及近代莫不
立儲樹嫡守器承祧乃旁挹羣議遠惟七百建茲蒙稚

仰副宗祊承華肇開崇基克永無疆之慶非獨在余思
霑渥澤被之遐邇可賜天下為父後者爵一級王侯以
下量錫幣帛

又

門下朕夙纘璿祚君臨四方夕惕寅畏若寘淵谷思所
以光闡洪基克隆鼎命王公卿士咸以為樹元立嫡有
邦所先守器傳統於斯為重是用俾茲幼蒙體乾作貳
永固宗祀以貞萬國元良之寄非獨在余宜令嘉慶被

之億兆可大赦天下賜民為父後者爵一級主者速施行

立內職詔

刑于垂訓周文所以表德壺闈失序漢氏所以喪邦並被諸方冊式昭戒勸魏晉以來雖云簡薄而內職名號參差不同在宋太始位置繁冗遂設九品且擬外朝填委椒掖徵費無已自此相仍踵以成舊昭陽九華千門萬戶朕受命自天始基七百思所以立防自邇貽厥將

來前代職品所宜因革外可詳議務令該允

使四方士民陳刑政詔

徑寸之寶或隱泥沙以人廢言君子斯戒朕聽朝晏罷
思聞政術雖百辟卿士有懷必聞而蓄響邊遐未臻魏
闕或屈以貧陋或間以山川頓足延首無因奏達豈所
謂沈浮靡漏遠邇兼得者哉四方士民若有欲陳言刑
政益國利民淪礙幽遠不能自通者各在條布所懷於
刺史二千石有可申採大小以聞

勸農訪民所疾苦詔

為齊帝作

門下執耜暨蹇則如懸比室秉機或情則無褐終年非
怠非荒雖由王道不稂不莠實賴民和頃歲多稼無莠
遺秉如積而三登之美未臻萬斯之基尚遠且風土異
宜百民殊務刑章治緒未必同源妨本害政事非一揆
晷旒屬念無忘夙興可嚴下州郡務滋耕殖相畝闢疇
廣開地利深樹國本克阜民天又詢訪獄市博聽謠俗
傷風損化各以條聞無使瘡痍之苦載興比屋主者詳

為科格稱朕意焉

搜隱逸詔

高尚其志義煥通爰山林不出訓光惇史朕聽朝晏罷
尚想幽人蒲玉之禮佇聞峻節可班下州郡博訊遠近
若有道映丘園事孚高尚可以弭競遷澆還風拯俗皆
以名聞靡或遺漏朕將闢衢室而寘几杖開東序而授
袞職庶令江海無遺異人必至

酬荊雍義士詔

昔義舉之初人懷自竭輸賦罄產同致厥誠言念一槩
思有所酬其雍荆郢三州有獻物助軍國者外可詳加
蠲報

赦詔

為齊
帝詔

門下朕肅纂乾統思弘祖業方欲克廣法猷寧濟遐邇
實賴羣才共康世務至於股肱宗戚情委特隆垂拱責
成緝熙是寄而各包藏禍心規縱醜逆朕每存容隱冀
或能悛而靡懲前愆彌結後釁七百業艱宗廟事重不

得不垂涕行戮以義斷恩或藩屬皇宗或睦姻近戚夫
豈不懷社稷故也雖四門已穆羣凶靡餘而泣辜之歎
義兼自昔方勵精思治登賢任官隆平之化庶從茲始
宜播嘉惠咸與維新可大赦天下自今月二十日昧爽
已前謀反大逆手殺人以下皆赦除之頃歲軍旅繁興
叛征者衆其質繫家屬及同伍代役三署見徒詳所由
原遣主者施行

又

門下王室多難祲沴相仍昔歲紛阻鋒交九達今茲狂
煽兵連萬雉時事屯厄罕有斯逆故今迷疑互起向背
者多元惡既懸猜懼彌廣奔亡草澤自反莫因近雖曲
赦與之更始而愚昧之徒猶多竄伏且遏寇未夷役連
遐邇刑政弛張陷罪非一思所以曠敷嘉惠被之億兆
可大赦天下凡與崔慧景協契同謀首為奸逆爰及降
叛輸力盡勤良由世道交喪流源浸遠風靡靡立以至
如斯悉皆盪滌一無所問凡諸反側咸與維新並加宣

慰還復民伍國信之明皎如日月榜勒畿要咸使聞知
惟崔慧景諸子不在赦例主者施行

立左降詔

刑乖政失其源已久罰罪之奏日聞於蚤朝弊獄之書
亟勞於晏寢免黜相係補代紛紜一離堡囚乃永歲月
非所以棄瑕錄用隨分盡才者也是故減秩居官前代
通則貶職左遷往朝繼軌自今內外羣司有事者可開
左降之科

降死罪詔

朕樹洪業光宅區宇而本枝之慶未廣椒掖滕衛之地
猶闕藩屏言念弓韜不能忘懷策三子始有磐石之資
於焉彌固慶雖自己恩加覃及凡死罪可降一等五歲
刑降二等三歲刑以下並悉原放

沈文季加侍中詔

為齊
帝作

門下散騎常侍尚書左僕射西豐縣開國侯新除鎮軍
將軍沈文季業宇流正鑑識超凡秉茲恭恪誠著匪躬

難起非慮密邇墉圻罄力盡勤萬雉增固寵服攸加實
為朝典可侍中僕射新除侯如故主者速施行

崔慧景加侍中詔

為齊
帝作

門下護軍將軍樂安縣開國子慧景志氣淹通識履詳
正誠烈歎盡義簡朕心加榮近侍抑惟朝序可加侍中
子如故主者速施行

授蕭惠休右僕射詔

為齊帝作○
英華云左僕誤

門下尚書萬事之本隆替是寄總司頓闕宜速有人征

虜將軍吳興太守建安縣開國子蕭惠休才學淹通識
裁詳允內著嘉庸外敷美政入副朝端僉議斯在可守
尚書右僕射餘如故主者施行

授王亮左僕射詔

為齊
帝作

門下朝端任重刑政斯出自非民望時宗莫諧茲舉通
直散騎常侍吏部尚書領太子左衛率王亮器識夷遠
風鑒清奧贊務釐朝庶績惟允宜崇名器以副具瞻可
尚書左僕射主者速施行

王亮王瑩加授詔

為齊帝作

門下京輔華貫端副要重政首民經任切朝寄尚書左
僕射亮濬哲淵深道風清邈時棟民譽僉望所歸中領
軍南徐州大中正南鄉侯瑩德宇夷曠鑑識凝遠

關

協隆內外允諧逆徒從慝躬衛時難氛祲既澄並宜光
贊緝熙穆茲景化亮可侍中丹陽尹瑩可侍中尚書左
僕射本官中正侯並如故主者施行

臨川王子晉南康侯子恪遷授詔

為齊帝作

門下侍中臨川王子晉志業清敏器尚夷通秘書監右
領軍南康縣開國侯子恪理識閑悟思懷韻整言宜出聞
朝政入侍帷幄子晉可左民尚書子恪可侍中王侯並
如故主者速施行

王茂加侍中詔

門下居中作衛號望清重任總儲宮朝難其選望蔡縣
開國公新除尚書右僕射茂器度淹弘志局詳穩契濶
艱夷情深恒寄顯命載加允副僉屬可侍中衛將軍領

太子詹事開國公如故給鼓吹一部主者施行

資給何點詔

遠趣高情前王所貴義兼昔款倍用興懷徵士何點居
貞物表縱心塵外夷坦之風率由自遠往因素志頗申
宴言眷彼子陵情兼惟舊昔仲虞邁俗受俸漢朝安道
逸志不辭晉祿此蓋前代盛軌往賢所同可詳加資給
並出所由契資須太官別給既人高曜卿故事同垣下

封授臨川等五王詔

門下神州帝城冠冕列岳渚宮樊鄧形勝是歸居中作
衛翌宣戎重隆名寵號寔允舊章並非親勿居惟賢斯
授西中郎將護軍宏朕之介弟早富德譽董一藩政緝
是嘉庸國禮家情瞻寄隆重使持節督南徐兗二州諸
軍輔國將軍南徐州刺史秀風穎雋邁識業標簡任居
藩翰政以化成使持節都督雍梁南北秦四州諸軍事
冠軍將軍寧蠻校尉雍州刺史偉體韻淹穆神寓凝正
經綸夷險參贊王業冠軍右衛將軍恢神檢外洽淵量

內湛奉職鈞陳周衛以穆使持節督荆湘益寧南北秦
七州諸軍事安西將軍荊州刺史愴秀識冲情允文允
武經啓王業寔有厥勤並契濶綢繆分形並氣處家盡
其匪躬朕承運迭興光宅四海藩維廣樹經朔攸屬出
納之宜望實惟允宏可使持節散騎常侍都督揚南徐
州諸軍事後將軍揚州刺史封臨川郡王秀可進號征
虜將軍餘官如故封安成郡王偉可使持節散騎常侍
都督雍梁荆寧南北秦六州郢州之竟陵司州之隨郡

諸軍事寧蠻校尉雍州刺史將軍如故封建安郡王恢
可侍中前將軍領石頭戍事領兵景佐封鄱陽郡王憺
可使持節都督荆湘益寧四州諸軍事平西將軍荊州
刺史封始興郡王食邑各二千戶

劉領軍封侯詔

為齊
帝作

門下南國是式事易興周原鹿啓土義昭洪漢領軍舅
親德之重朝野式瞻在昔中興任推心膂哀疚眇然未
堪多難允賴徽猷嗣隆寶業及豐起不虞咫尺宮禁內

參嘉謨外宣戎畧密勿劬勞誠力備盡宗社克固寔倚
高謨無言不讐無德不報况忠勳至戚義兼於此者乎
宜錫圭裂壤允副僉屬可封開國縣侯食邑二千戶主
者施行

王亮等封侯詔

為齊
帝作

門下尚書左僕射亮中領軍南鄉侯南徐州大中正瑩
守吏部尚書志並時宗民秀微望允集協贊朝機彝倫
是寄秉文經武任惟腹心方賴嘉謨克弭時難宜疏爵

建社與國同休亮瑩可各封一千五百戶開國縣侯本
官中正如故志封千戶開國縣侯本官如故主者速施
行

常僧景等封侯詔

為齊
帝作

門下廬陵王中兵參軍事宣閣將軍軍主新除右軍常
僧景車騎江夏王參軍事宣閣將軍新除右軍中郎將
薛元嗣安東廬陵王參軍事振武將軍徐元稱假寧朔
將軍廬陵王國侍郎延明主帥殷係宗前軍將軍宣閣

格虎隊主馬廣或氣略強果或志識貞濟或忘家奉國
誠著夷險方寄戎昭克清時難宜命爵啓土以獎厥勞
可封一千戶開國縣侯本官新除驅使悉如故主者施
行

封三舍人詔

為齊
帝作

門下輔國將軍驍騎將軍南高平太守兼中書通事舍
人沈徽孚給事中驍騎將軍臨淮太守兼中書通事舍
人王咥之寧朔將軍南濮陽太守兼中書通事舍人裴

長穆並以素胄清才服勤禁省契濶劬勞自頃多難軍
國務殷內參帷幄外濟師旅忠規款志義感朕心宜錫
茅社同莅賞冊可封三百戶開國縣伯本官郡驅使並
如故主者速施行

封申希祖詔

為齊
帝作

門下持節督司州諸軍事冠軍將軍司州刺史申希祖
志氣沈隱才畧開濟在昔多難任參心膂爰及中興忠
款彌著契濶艱虞盡其心力逮獯獫侵斥武節颺騰殘

寇外殄危城獨困休庸茂績朕有嘉焉宜錫茅土以酬
勤烈可封開國伯食邑五百戶本官如故主者施行

封李居壬等詔

為齊
帝作

門下新除太子左衛率軍貞主李居壬志識開敏器懷
貞濟盡力禁門誠著夷險新除太子右衛率軍主潮陽
縣開國男胡松性業詳固才用果烈新除都督青冀二
州諸軍事寧朔將軍青冀二州刺史柏和剛正欵率屢
著勤効新除左中將軍主鴻選氣質強果秉心壯宣並

反旆南轅以赴危難身先士卒翦此鯨鯢功勤碩茂宜
隆賞典居壬可封一千戶開國縣侯松可增封為七百
戶和可封五百戶開國縣伯選可封三百戶開國縣男
新除持節刺史將軍主男並如故主者施行

封徐世標詔

為齊
帝作

門下驍騎將軍彭城令徐世標才畧貞濟志懷義烈忠
節內款勳勤外著禦侮折衝任惟心膂頃茲隱潛煽危
機驟發夷凶弭難實有力焉宜命賞疇庸錫茲土宇可

封開國縣子食邑三百戶

封左興盛等詔

為齊
帝作

門下逆豎王敬則縱兵內侮陵斥畿甸輔國將軍前軍
將軍事左興盛直閭將軍劉山陽受律前驅焱勇爭路
或衡至首旆或陷懸中麾元惡梟至氛梗載廓賞不踰
時義弘前典可封開國男食邑二百戶並進位一階主
者速施行

勅

梁武帝踐祚與州郡勅

欽惟邃古爰及近代雖禪代異時而成功一揆豈惟靜
民寧亂實由符運總集故能啓業垂統光宅區夏齊氏
遭茲昏詖斯亡奄及民命蠢蠢倒懸非喻朕大懼四海
舟覆二象雲傾億兆與崑岡並燎搢紳與蘊崇共日永
言悽悼發憤經營推鋒投袂電擊風掃藉上天之靈因
熊羆之用德未半古功侔前烈齊氏既欽若虞夏高揖
萬邦兼以冥符先著樂推攸在幽顯宅心辭不獲命猥

以虛寡君臨萬國川壑之懷寤寐盈慮方欲昧旦丕顯
日是忘勞思與賢能康濟世道卿擁旄萬里共治是寄
當求民瘼留念獄市威斷以御強猾仁惠以撫貧孤使
遠近幽深咸得其所方虛位欽能懸爵佇効勿令漢代
璽書獨行於自古晉世班條靡用於茲日想加克勉副
其側席

與謝朓勅

吾以菲德屬當期運鑒與吾言思隆治道而明不遠燭

所蔽者多實寄賢能匡其寡闇嘗謂山林之志上所宜
引激貪厲薄義等為政自居元首臨對百司雖復執文
經武各修厥職羣才競爽以致和美而鎮風靜俗變教
論道自非箕穎高人莫膺茲寄是用虛心側席屬想清
塵不得不屈茲獨往同此濡足便望釋蘿襲衣出野登
朝必不以湯有慙德武未盡善不降其身不屈其志使
壁帛虛往蒲輪空歸傾首東路望兼立表義軒邈矣古
今殊事不獲總駕崆峒依風問道今方復引領雲臺虛

已宣室紆賢之愧載結寢興

與何胤勅

吾猥當期運膺此樂推而顧已多蔽昧於治道雖復劬
勞日昃思致隆平而先王遺範尚蘊方策息舉之用存
乎其人兼以世道澆暮爭詐繁起改俗遷風良有未易
自非以儒雅引朝高尚軌物則汨流所至莫知其限治
人之與治身獨善之與兼濟得失去取為用孰多吾雖
不學頗好博古尚想高塵每懷擊節今世務紛紜憂責

是當不得不屈道巖阿共成世美必望深達往懷不吝
濡足

制

授蔡法度廷尉制

門下民命所懸繫乎三尺止殺除殘寔由乎此是以臯
陶作士五刑惟明于張蒞官世無冤獄且漢代律書出
乎小杜吳雄以三世法家繼為理職郭恭以律學通明
仍業司士爰及晉氏此風未泯叔則元凱並各名家自

茲厥後斯尚漸薄迄至於今損棄頓盡衣冠士子耻復
用心州郡姦吏恣其取捨舞文弄法非止一塗朕膺天
受命為兆民主每一念此忘寢與食尚書刪定左曹郎
中蔡法度少好律書明曉法令世之所廢篤志不怠至
於章句踳滯名程乖礙莫不斟酌厥衷允得其門方欲
寄以國刑開示後學拔才取士豈有定方自世道澆流
浮偽雲起量計多少辯校錐刀若遵往從舊守而勿失
豈所以軌儀上世垂風于後宜加褒擢弗繫常階可守

廷尉卿主者施行

授王績蔡約王師制

為齊帝作

門下冠軍將軍司徒左長史始平縣五等男績華宗冠
冑器質詳和都官尚書約清源素範體業倫正訓茲蕃
國僉議攸在績可隨郡王師加散騎常侍男如故約可
零陵王師加給事中主者速施行

疏

修定樂書疏

竊以秦代滅學樂經殘亡至於漢武帝時河間獻王與
毛生等共採周官及諸子言樂事者以作樂記其內史
丞王定傳授常山王禹劉向校書得樂記二十三篇與
禹不同向別錄有樂歌詩四篇趙氏雅琴七篇師氏雅
琴八篇龍氏雅琴百六篇唯此而已晉中經簿無復樂
書別錄所載已復亡逸按漢初典章滅絕諸儒捃拾溝
渠牆壁之間浮片簡遺文與禮事相關者即編次以為
禮記非皆聖人之言月令取呂氏春秋中庸表記緇衣

皆取子思子樂記取公孫尼子檀弓殘雜又非方幅典
誥之書也禮記是行已經邦之功故前儒不得不補綴
以備事用樂書事大而用緩自非逢欽明之主制作之
君不見詳議漢氏以來主非欽明樂既非人臣急事故
言之者寡陛下以至聖之德應樂推之符實宜作樂崇
德殷薦上帝而樂書淪亡尋案無所宜選諸生分令尋
討經史百家凡樂事無大小皆別纂錄仍委一舊學撰
為樂書以起千載絕文定大梁之樂使五英懷慚六莖

興愧

論譜籍疏

晉咸和初蘇峻作亂文籍無遺後起咸和二年以至於
宋所書並皆詳實並在下省左戶曹前廂謂之晉籍有
東西二庫此籍既並精詳寔可寶惜位官高卑皆可依
案宋元嘉二十七年始以七條徵發既立此科人姦互
起偽狀巧籍歲月滋廣以至於齊患其不實於是東堂
校籍置郎令史以掌之競行姦貨以新換故昨日卑細

今日便成士流凡此姦巧並出愚下不辨年號不識官階或注隆安在元興之後或以義熙在寧康之前此時無此府此時無此國元興唯有三年而猥稱四五詔書甲子不與長厯相應校籍諸郎亦所不覺不才令史固自忘言臣謂宋齊二代士庶不分雜役減闕職由於此竊以晉籍所餘宜加寶愛

議乘輿升殿疏

正會儀注御出乘輿至太極殿前納舄升階尋路寢之

設本是人君居處不容自敬宮室按漢氏則乘小車升
殿請自今元正及大公事御宜乘小輿至太極階仍乘
版輿升殿

表

上宋書表

臣約言臣聞大禹刊木事炳虞書西伯勘黎功煥商典
伏惟皇基積峻帝烈弘深樹德往朝立勲前代若不觀
風唐世無以見帝嫺之美自非覩亂秦餘何用知漢祖

之業是以掌言未記爰動天情曲詔史官追述大典臣
實庸妄文史多闕以茲不才對揚盛旨是用夕惕載懷
忘其寢食者也臣約頓首死罪竊惟宋氏南面承平統
天雖世窮八主年減百載而兵車亟動國道屢屯垂文
簡牘事數繁廣若夫英主啓基名臣建績拯世夷難之
功配天光宅之運亦足以勒銘鐘鼎昭被方策及虐后
暴朝前王罕二國釁家禍曠古未書又可以式規萬葉
作鑒于後宋故著作郎何承天始撰宋書草立紀傳止

於武帝功臣篇牘未廣其所撰志唯天文律歷自此外
悉委奉朝請山謙之謙之孝建初又被詔撰述尋值病
亡仍使南臺侍御史蘇寶生續造諸傳元嘉名臣皆其
所撰寶生被誅大明中又命著作郎徐爰踵成前作爰
因何蘇所述勒為一史起自義熙之初訖於大明之末
至於臧質魯爽王僧達諸傳又皆孝武所造自永光以
來至於禪讓十餘年內闕而不續一代典文始末未舉
且事屬當時多非實錄又立傳之方取捨乖衷進由時

昔退傍世情垂之方來難以取信臣今謹更創立製成
新史始自義熙肇號終於昇明三年桓玄譙縱盧循馬
魯之徒身為晉賊非關後代吳隱謝混郗僧施義止前
朝不宜濫入宋典劉毅何無忌魏詠之檀憑之孟昶諸
葛長民志在興復情非造宋今並刊除歸之晉籍臣遠
愧南董近謝遷固以閭閻小才述一代盛典屬辭比事
望古慙良鞠躬跼蹐汗亡厝本紀列傳繕寫已畢合
志表七十卷臣今謹奏呈所撰諸志須成續上謹條目

錄詣省拜表奉書以聞臣約誠惶誠恐頓首頓首死罪
死罪

上注制旨連珠表

竊尋連珠之作始自子雲放易象論動模經誥班固謂
之命世桓伊以為絕倫連珠者蓋謂辭句連續互相發
明若珠之結排也雖復金鑣互騁玉軼並馳妍媸優劣
參差相間翔禽伏獸易以心威守株膠漆難與適變水
鏡芝蘭隨其所遇明珠燕石貴賤相懸

為柳世隆上銅表

夫幣以周務貨以賑民阜國康治莫尚乎此周氏致平
始於園法漢世幾措資於貫朽名鑪化金良工盡藝方
將盈金中截收功上苑南楚陋其方府西京鄙其部內
上建闕表

恭惟哲后舊章必修眇矚前王復古為貴伏惟陛下欣
咨故實率由令典昔在有晉經創江左邦訓莫釐遠圖
多缺萬雉之外兩觀弗興空指南峰懸法無所世歷三

代年將二百非所以經世成務垂業後昆天德圓應憲
章自遠宜詔匠人建茲象闕俯藉愛禮之心以申子來
之願式表端闡儀刑萬國使觀風而至復聞正歲之典
遐想之士少寄懷古之目

為柳兗州世隆上舊宮表

舊宮蘊靈千古合祥百代萬祇相祉八神警室事超齊
甸義邁譙宮故能屬輦道於天階命帝闕於霄路實宜
樹闕疏壤寫極上穹克播徽塵永光盛烈

舉胡元秀表

竊惟經邦御遠雖待大賢摧鋒犯鎬亦資小用伏見錢塘新城主胡元秀早歲驅馳意幹強果矛盾之用氣凌百夫若置之六師之間處之一旅之上必能前奮獷敵却沮強胡臣實弱懦不窺武節昧妄輕言伏懷悚懼

薦劉粲表

陛下則天開業冠帶要荒輜軒韋轂交軫於遐路捨築投竿相望於魏闕或以開圻未採管庫遺賢執戟忘疲

倚輶不息

與沈淵薦沈麟士表

吳興沈麟士英風夙挺峻節早樹貞粹稟於天然綜博
生乎篤習家世孤貧藜藿不給懷書而耕白首無倦挾
琴採薪行歌不輟長兄早卒孤姪數四攝匡鞠稚吞苦
推甘年踰七十業行無改元嘉以來聘召仍疊玉質踰
潔霜操日嚴若使聞政王庭服道槐掖必能孚朝規於
邊鄙播聖澤於荒垂

為柳世隆讓封公表

臣聞懸旌玉塞貳師尚黜其功伐鼓炎州伏波猶懼其
賞徒以兼委之施或難固辭抽心之情必無雙奪是故
倪容青閣願還慈於裂壤竊步丹墀希收寵於開賦昔
竄命窮雉難迫勢孤沈板未難負戶非切及顧溫清之
館懼結尊慈之懷累葉喁喁舉門惴惴臣事逼君親理
非外獎實賴朝謨謹肅宰畧遐震奔鯨外剿臣何力焉
幸得扶老攜弱重出幽堵還軸歸驂再踐鄉路豈可資

國肯以邀其功因衆功而饗其報遂使甘霜受電之心
有同於飾請皎日大河之志匪殊於貌謁

為褚炫讓吏部尚書表

竊惟玄素未辨必謬朱紫之察規矩或昧理喪方圓之
功東西兩漢左雄孤絕於前南北二晉山濤莫嗣於後
良由性藏於貌才隱乎心楚越無以況其迥殊山川未
足方其險阻雖復拂暗為明勉愚生智亦何以登奇援
異離渭分涇

為南郡王讓中軍表

臣聞建侯茂則非賢罔樹分器鴻典惟懿寔先而臣挹
道未引踐義多缺徒升國典空襲宸寵光珪華組掩藹
于闕垂令采徽猷寂寥於甸表晨伸委帶夕軫臨顏皇
衢肇啓鼎運始資魯衛兼啓義邈周年齊楚並建禮高
漢日臣以末第聯輝上序祐履荆阿懷璽臺曲拊志惟
熏佩握如擣

為始興王讓儀同表

徒塵翠幄方降紫泥以茲上令用隔下情況高擬萬石
爰均八命室等天潢服加黼黻出則高陪千乘入則仰
司百揆陛下道苞九舜明出十堯萬微必理一物興念
有紆玄鏡暫垂止水

讓僕射表

臣聞役壯休老上典所優晨行暮息事身恒分若夫玄
黃未已非秋駕之衛筋力為用豈強飯之時養老杖鄉
抑推前典服戎告謝親學匪任宿肉極其虛憊歲制防

其不辜寔所以蠲假衰疾收屏淪暮

讓五兵尚書表

臣聞百舍之趙非宿春所資千里之越豈一輦能泝何
者裝輕適於路遠舟弱疲於濟深醜貌悴容不藉鑒於
溜水驚足蹇步終取躓于鹽車

為皇太子謝表

臣實蒙稚溫文以闕不閑三善之訓未習四學之儀雖
問安內豎因心自發而視膳寢門未任再至乃降皇慈

夙膺盛典貳體宸極守器宗祧顧循幼志如臨冰壑

為長城公主謝表

奉策書封妾為長城縣公主徽命降臨慙腆妄寘妾膺
靈稟氣育景璇閨弱志易淪柔德難樹雖復式修姆保
莫敢或遑而肅雍不著穠華蓋闕不悟宸暉曲漸彝章
夙貢籍此恩加遽延典策湯沐光啓珩琚昭被

謝封建昌侯表

陛下投袂萬里拯厥塗炭臣雖心不吠堯而迹淪桀犬

此則王業始基臣所不與徒荷日月之私竟無蒸燭之
用天命元鳥非止今日受命作周其來久矣雖復備數
樂推與同謳頌而誠微弱草效闕纖塵遂班山河之誓
叨佐命之賞亦何以慰悅惟帳酬報爪牙

謝母封建昌國太夫人表

伏見詔書以臣母封為建昌國太夫人慶溢蓬門榮流
素族恭荷屏營罔識攸真臣稟訓私閨志塗靡立勉以
為義誠有由然輸力致身曾無萬一天慈罔已至德彌

光採其私志降此洪澤榮親之至始自微臣率斯道也
方流萬物草卉輕命固莫云酬

到著作省謝表

臣約言即日被召以本官兼今職臣藝不博古學謝專
家乏懷鉛之志慙夢腸之術聯事乖善握蘭慚良謬勒
斷蛇之符預刊冰河之業路遙難騁才弱未勝而神工
曲造雕絢彌疊珥筆史觀記言文府趨奉載揚腴懣交
顏

拜尚書令到都謝表

竊位之譏允當斯責王命私請有事相傾油雲湛露徒
降旻昊之德弱縞輕蟬不載山嶽之重登階望席恍焉
失步

謝立皇太子賜絹表

臣聞重離在天八紘之所共仰明兩作貳萬國所以咸
寧太子體岐弱載表睿冲茂典冊既升休祚方遠率土
含歡遐邇均忭天情載洽慶賜必周幣帛嘉貺猥班庸

劣

謝賜新厯表

竊惟觀斗辨日馭生為本審時分地稼政莫先何則勝
殺無舛拘忌之理難忽珠璧有徵禮節之原攸序

致仕表

徒以桑榆無幾時制行及不朝之禮忽在今辰使反身
敝廬待終窮巷臣又聞之懸車散髮其來舊矣昔廣德
請骸義在量力二疏知止懼貽後悔數年以來稍就盡

竭氣力衰耗不自支持若蒙天地大恩造物洪施拯其
隆滿之切救其害盈之災譬彼日是假榮終朝跼蹐夕
景少觀盛化宅壤歸泉自無云幾祈仁仰澤事止寸陰
臨終遺表

臣約言臣抱疾彌留迄今卽化形神欲離月已十數窮
楚極毒無言以喻平日健時不言若此舉刀坐劒比此
為輕仰惟深入法門厲茲苦節內矜外恕寔本人情伏
願聖心重加推厲微臣臨途無復遺恨雖慚也善庶等

鳴哀

章

為安陸王謝荊州章

臣托景宸區早延休寵身班帝穆爵首藩圭好禮慚河
敦詩愧楚懸旆出關徒違絳闕擬金入濟識謝戎麾而
照臨彌廣復叨匪服紀南形勝任總上游西緯岷邛北
維嶠陝六轡在手猶或稱難羣牧稟威茲道孰易是以
攄情陞曲布款幄垂霄途嚴遠事隔披照腴冒斯顏膺

此謬荷祇奉兢據罔知攸記

為晉安王謝南兗州章

臣以萊孱幼無秀業依天宅照藉海憑瀾王爵早加藩
麾宿樹進不能閑詩西楚好禮北河退無以振采六條
宣風萬里懷慙起懼載溢心顏而皇明輝燭照被彌遠
遂乃徙旆淮區遷金濟服朱駟出邸青組臨方瞻惟徵
寵俯仰亡厝

為六宮拜章

蓬閣非質嘉淑無筭越自幽衡登軀宸漢奉日月之華
侍巾屐之末何以廁鴛鸞之盛序奉屬車之清塵

彈文

奏彈王源

給事黃門侍郎兼御史中丞吳興邑中正臣沈約稽首
言臣聞齊大非偶著乎前誥辭霍不婚垂稱往烈若乃
交二族之和辨伉合之義升降宸隆誠非一揆固宜本
其門素不相奪倫使秦晉有匹涇渭無舛自宋氏失御

禮教雕衰衣冠之族日失其序姻婭淪雜罔計廝庶販
鬻祖曾以為賈道明目腆顏曾無愧畏若夫盛德之胤
世業可懷樂邵之家前徽未遠既壯而室竊賢莫非阜
隸結褵以行箕帚咸失其所志士聞而傷心舊老為之
歎息自宸歷御寓弘革典憲雖除舊布新而斯風未殄
陛下所以負宸興言思清敬俗者也臣實懦品謬掌天
憲雖埋輪之志無屈權右而狐鼠微物亦蠹大猷風聞
東海王源嫁女與富陽滿氏源雖人品庸陋胄實參華

曾祖雅位登八命祖少卿內侍帷幄父璿升采儲闡亦
居清顯源頻叨諸府戎禁預班通徹而託姻好唯利是
求玷辱流輩莫斯為甚源人身在遠輒攝媒人劉嗣之
到基辨問嗣之列稱吳郡滿璋之相承云是高平舊族
寵奮肩胛家計溫足見託為息鸞覓婚王源見告窮盡
即索璋之簿閱見璋之任王國侍郎鸞又為王慈吳郡
正閣主簿源父子因共詳議判與婚璋之下錢五萬以
為聘禮源先喪婦又以所聘餘直納妾如其所列則與

風聞符同竊尋璋之姓族士庶莫辨滿奮身殞西朝脣
嗣殄沒武秋之後無聞東晉其為虛託不言自顯王滿
連姻實駭物聽潘楊之睦有異於此且買妾納媵因聘
為資施衿之費化充牀第鄙情贅行造次以之糾慝繩
違允茲簡裁源即罪主臣謹案南郡丞王源忝藉世資
得參纓冕同人者貌異人者心以彼行媒同之抱布且
非我族類往哲格言薰蕕不雜聞之前典豈有六卿之
胄納女於管庫之人宋子河魴同穴於輿臺之鬼高門

降衡雖自己作葢祖辱親於事為甚此風弗翦其源遂
開黜世塵家將被比屋宜寘以明科黜之流伍使已污
之族永愧於昔辰方媾之黨革心於來日臣等參議請
以見事免源所居官禁錮終身輒下禁止視事如故源
官品應黃紙臣輒奉白簡以聞

奏彈孔稚珪違制啓假事

臣聞禁憲有章士子攸慎守官有典觸網斯及蓋所以
崇威闡法下肅上尊謹按廷尉會稽邑中正臣稚珪歷

奉朝班頻登要近九棘之任理無休謁冒制干聞實虧
恒典思許雖降所制不闕違犯之條猶合約黜且稚珪
俯自內轄作士下闡通制明文日陳几案自踰規矩莫
斯為甚臣等參議請以見事免稚珪所居官除中正官
名輒下禁止

奏彈奉朝請王希聃違假

謹按奉朝請臣王希聃幸齒朝班私敬蓋闕休請有期
曾無逮及違弛之僞言允膺裁糾臣等參議請以見事免

所居官輒下禁止

奏彈御史孔橐題省壁悖慢事

謹按奉朝請臺侍御史臣孔橐淺劣無聞謬列華省假攝去來仕子常務况東臯賤品非藉豐資旬日暫勞豈云卑辱而肆此醜言題勒禁省比物連類非所宜稱黜之流伍寔允朝憲臣等參議請以見事免橐所居官輒下禁止

奏彈秘書郎蕭遙昌

謹按兼秘書郎臣蕭遙昌盛威茂年升華秘館淑慎之迹未彰違情之容已及宜寘徽網以肅朝風請以見事免遙昌所居官

奏彈王僧佑

僧佑為太子中舍人在直屬疾
不待對入輒去中丞沈約彈之

肆情運氣不顧朝典揚眉闊步直轡高驅

修竹彈甘蔗文

長兼淇園貞幹臣修竹稽首臣聞芟蕘蘊崇農夫之善

法無使滋蔓翦惡之良圖未有蠹苗害稼不加窮伐者
也切尋蘇臺前甘蕉一叢宿漸雲露荏苒歲月擢本盈
尋垂蔭含丈階緣寵渥銓衡百卉而予奪乖爽高下在
心每叨天功以為已力風聞籍聽非復一塗猶謂愛憎
異說所以挂乎嚴網今月某日有臺西階澤蘭萱草到
園同訴自稱雖慚杞梓頗異蒿蓬陽景所臨由來無隔
今月某日巫岫歛雲秦樓開照乾光引普罔幽不矚而
甘蕉攢莖布影獨見鄣蔽雖處臺隅遂同幽谷臣謂偏

辭難信敢察以情登攝甘蕉左近杜若江離依源辨覆
兩草各處異列同欸既有證據羗非風聞切尋甘蕉出
自藥草本無芬馥之香柯條之任非有松栢後彫之心
蓋闕葵藿傾陽之識馮藉慶會稽絕倫等而得人之譽
靡即稱平之聲寂寞遂使言樹之草忘憂之用莫施無
絕之芳當門之弊斯在妨賢敗政孰過於此而不除戮
憲章安用請以見事徙根翦葉斥出臺外庶懲彼將來
謝此衆屈

啓

賀齊明帝登祚啓

竊惟皇源浚遠帝寶連暉基深慶厚道貫萬葉而鬱林
凶德早樹行悖人經逖聽之所未書宗廟之殆如綴百
靈聳動九服迴遑結后來之望思庇民之主日月以冀
遐邇翹心伏惟陛下大聖在躬君德夙表龍章日綵煥
若麗天納麓賓門道風遐被睿化神行無思不洽獄訟
允歸天人戴仰屈飛龍之眇轡紆汾陽之遠情運堯心

以臨億兆敷舜烈以膺寶命雖中宗之興殷道宣后之
隆漢德異世同符千載一揆刑措之業方遠隆平之基
在焉率土含欣懷生戴賴况臣早蒙覆潤夙荷恩靈踴
躍外畿心不勝慶謹繙民和式流皇澤塗歌里抃載懷
鳧藻

上錢隨喜光宅寺啓

伏惟中陽故里春陵舊居夷漫滌蕩曾無遺築若使大
教早流法導二代開塔白水樹剎枌榆可以傳美垂跡

迄今不朽

送育王像并上錢燭等啓

竊以無名無色理絕應感不身即身猶觀願力惟願燈
明道成長為八喜之侶菩提無上永厠干子之蹤

謝賜甘露啓

約言左右徐儼宣勅垂賜法音寺松葉上甘露臣往年
經見不過霑條而已時或凝結纔若輕霧未有玉聚珠
聯光粲若是寔由積仁上通冥德下降故能委華霄極

零被後彫慈旨曲洽頒此祥賚不任欣荷謹以啓事謝
以聞

謝勅賜冰啓

竊惟司寒輟響眇自前代凌室曠官歷茲永久聖功闡
物逸典備甄窮深既採園池靡用有籍羔秬無災霜雹

約又有謝賜交州檳榔啓
云龍綸嘉實厥包遐遠

謝賜軫調絹等啓

霜紈雪委霧縠冰鮮昔劉氏歸國未聞漢儲之禮曹植

還蕃非降魏兩之賜恩逾枉道責深東帛

謝勅賜絹葛啓

素采冰華絺文霜潔變溽暑於閨閣起涼風於襟袖

謝齊竟陵王教撰高士傳啓

竊聞高尚其事義光爰象賢者避世聲煥典墳豈徒激
貪勉競澡身浴德而已爾乃大弘義訓百代通風是以
梁鴻蘇伯記遠迹於前叔夜士安書高塵於後雖去取
異情羣略殊軫而獨行必彰片言罔極貞操與日月俱

懸孤芳隨山壑共遠明公得一含道體二居宗迹屈巖
廊之下神遊江海之上愛奇商洛訪美東都蓋欲隱顯
齊功出處同致巢由與伊旦並流三辟與四門共軌肅
奉明規思自罄勛

謝齊竟陵王示華嚴瓔珞啓

竊以六詩雨散百氏雲興或事止褒刺或義單小辯莫
不雕風煙之氣狀流日月之英華明公該玄體妙凝神
宙表廕法雲於六合揚慧日於九天因果悟其初心菩

提證其後業陟無生之遠岸汎正水之安流受三遠十
號之尊崇建四辨八聲之妙極法身與金剛齊固常住
與至理俱存

謝齊竟陵王示永明樂歌啓

鳳綵鸞章霞鮮錦縟覲寶河宗未必比麗觀樂帝所遠
有慚德雖日月在天理絕稱詠而徘徊光景不能自息
謝竟陵王賚母赫國雲氣黃綾裙襦啓

竊以積絲成綵散繭騰花巧擅易水之間價貴聚臺之

下民受祿為養霑荷彌深聖恩曲漸自葉流根複袖緼裾豈伊恒飾榮新之寵固難輕報

謝女出門宮賜絹綺燭啓

桓室金縷本非所議孟姬作具獨若未周慈澤曲臨珍華兼重製為美服隻綺易儔舉而不息三夜有待

謝司徒賜北蘇啓

曠阻陰山之外眇絕蒲海之東自非神力所引莫或輕至聖慈普洽遂遍島微停鑣懼喘既引道於世務方駕

四衢又興言於俗表

為柳世隆謝賜樂游胡桃啓

挺自禁園味逾并絡動物迴祇在微必應此乃胡羯奔
逃吉之先見者也

為東宮謝勅賜孟嘗君劍啓

田文重氣狗名四豪莫及寶劍雄身故能威陵秦楚人
高事遠遺物足奇謹加玩服以深存古之懷

為皇太子謝賜御所射雉啓

輕鑿微動密翳徐張黃間所穀矢無虛發南皮之獲未
足稱工臣任惟守器事隔陪奉天慈曲降賜物頒禽

荅釋法雲啓

神本不滅久所服膺神滅之談良用駭惕近約法師殿
內出亦蒙勅荅臣下一本懽受頂戴尋覽忘疲豈徒伏
斯外道可以永摧魔衆孔釋兼弘於是乎在實不刊之
妙音萬代之舟航弟子亦即彼論微厝疑覈比展具以
呈也沈約呈

書

與徐勉書

吾弱年孤苦傍無耆屬往者將墜於地契濶屯邅困於
朝夕崎嶇薄宦事非為已望得小祿傍此東歸歲逾十
稔方忝襄陽縣公私情計非所了具以身資物不得不
任人事永明末出守東陽意在止足而建武肇運人世
膠加一去不還行之未易及昏猜之始王政多門因此
謀退庶幾可果託卿布懷於徐令想記未忘聖道聿興

謬逢嘉運往志宿心復成乖爽今歲開元禮年云至懸
車之請事由恩奪誠不能弘宣風政光闡朝猷尚欲討
尋文簿時議同異而開年以來病增慮切當由生靈有
限勞役過差總此凋竭歸之暮年牽策行止努力祇事
外觀傍覽尚似全人而形骸力用不相綜攝常須過自
束持方可僂俛解衣一卧支體不復相關上熱下冷月
增日篤取煖則煩加寒必利後差不及前差後劇必甚
前劇百日數旬革帶常應移孔以手握臂率計月小半

分以此推算豈能支久若此不休日復一日將貽聖主
不追之恨冒欲表聞乞歸老之秩若天假其年還得平
健才力所堪惟思是策

答陸厥問聲韻書

宮商之聲有五文字之別累萬以累萬之繁配五聲之
約高下低昂非思力所學又非止若斯而已也十字之
文顛倒相配字不過十巧歷已不能盡何況復過於此
者乎靈均以來未經用之於懷抱固無從得其髣髴矣

若斯之妙而聖人不尚何邪此蓋曲折聲韻之巧無當於訓義非聖哲立言之所急也是以子雲譬之雕蟲篆刻云壯夫不為自古辭人豈不知宮羽之殊商徵之別雖知五音之異而其中參差變動所昧實多故鄙意所謂此秘未覩者也以此而推則知前世文士便未悟此處若以文章之音韻同絃管之聲曲則美惡妍蚩不得頓相乖反譬猶子野操曲安得忽有嘽緩失調之聲以洛神比陳思他賦有似異手之作故天機啓則律呂自

調六情滯則音律頓舛也士衡雖云炳若縵錦寧有濯
色江波其中復有一片是衛文之服此則陸生之言即
復不盡者矣韻與不韻復有精麤輪扁不能言之老夫
亦不盡辨此

答樂藹書

丞相風道弘曠獨秀生民凝猷盛烈方軌伊旦愁遺之
感朝野同悲永當刊石紀功傳華千載宜須盛述實允
來談郭有道漢末之匹夫非蔡伯喈不足以偶三絕謝

安石素族之台輔時無麗藻迄乃有碑無文况文獻王
冠冕彝倫儀刑寓內自非一世辭宗難或與此約閭閻
鄙人名不入第歟酬今旨便是以禮許人聞命慙顏已
不覺汗之沾背也

答沈麟士書

獨往之業雖聞前載高塵逸軌罕或共時未嘗不拊衮
興懷望古遐矚尊賢拔俗遙然沉冥自遠幽貞之操義
高篆策雖將詡不窺城市鄭真名動京師何遠之有名

山既鄉內所豐清川又坐卧可對不出戶庭而與禽尚
齊美哉約少不自涯早愛蟲鳥逐食推遷未諧夙願冀
幽期可托克全素履與尊弋釣泉臯以慰閑暮則生平
之心於此遂矣

與范述曾論齊竟陵王賦書

夫眇汎滄流則不識涯涘雜陳鐘石則莫辨宮商雖復
吟誦環迴編離字滅終無以仰酬睿旨微表寸長

與陶弘景書

先生糠粃流俗超然獨遠列霓羽帶總轡雲霞方當名
書絳簡身遊玄闕憑星夕卧望日朝食而至理深微暖
馬難睹雖欲下風問道未知厥路若夫栖遲閒遠咀嚙
瓊芝出入清都師友靈聖循崖反跡無缺惟心

報王筠書

覽所示詩實為麗則聲和被紙光影盈字夔牙接響顧
有餘慚孔翠羣翔豈不多愧下情拙目每佇新奇爛然
總至懽興已盡會昌昭發蘭揮玉振克諧之義寧比笙

審思力所該一至于此歎服吟研周流戀念昔時幼壯
頗愛斯文含咀之間倏焉疲暮不及後進誠非一人擅
美推能寔歸吾子遲比閒日清覲乃申

報博士劉杳書

生平愛嗜不在人中林壑之懽多與時奪日暮塗殫此
心往矣猶復少存閒遠徵懷清曠結宇東郊匪云止息
政復頗寄夙心時得休偃仲長游居之地休璉所述之
美望慕空深何可髣髴君愛素情多惠以二贊辭采妍

富事義畢舉句韻之間光影相照便覺此地自然十倍
故知麗辭之益其事弘多輒當置之閣上坐卧嗟覽別
卷諸篇並為名製又山寺既為警策諸賢從時復高奇
解頤愈疾義兼乎此遲比叙會更共申折

與約法師書

周中書風趣高奇志託夷遠真情素韻水桂齊質自接
彩同栖年逾一紀朝夕聯事靡日暫違每受沐言休道
遙寡務何嘗不北茨游覽南居宴宿春朝聽鳥秋夜臨

風匪設空言皆為實事音容滿目言笑在耳宿草既陳
楸檟將合眷往懷人情不勝慟此生篤信精深甘此藿
食至于歲時包篚每見請求凡厥菜品必令以薦弟子
輒靳而後與用為歡謔其事未遠其人已謝昔之諧調
倏成悲緒去冬今歲人鬼見分石耳紫菜愴焉興想淚
下不禁指遣恭送以充蔬僧一飯法師與周情期契濶
非止恒交覽物存舊彌當楚切痛矣如何往矣奈何弟
子沈約和南

序

梁武帝集序

文思安安欽明所以光宅日月光華南風所以興詠日
角之主出自諸生銳頂之君少明古學漢高宋武雖闕
章句歌大風以還沛好清談於暮年夫成天地之大功
膺樂推之寶運未或不文武兼資能事斯畢者也我皇
誕縱自天生知在御清明內發疏通外典爰始貴遊篤
志經術究淹中之雅旨盡曲臺之奧義莫不因流極源

披條振藻若前疑往滯舊學罕通而超然直詣妙援終
古善發談端精於持論置壘難踰摧鋒莫擬有同成誦
無假含毫興絕節於高唱振清辭於蘭畹至於春風秋
月送別望歸皇王高宴心期促賞莫不超挺睿興濬發
神衷及登庸歷試辭翰繁蔚牋記風動表議雲飛雕蟲
小藝無累大道懷君人之大德有事君之小心為下奉
上形於辭旨雖密奏忠規遺橐必削而國謨藩政存者
猶多逮乎俯應歸運仰修乾錄載筆握簡各有司存如

綸之旨時或染翰暨於設簾靈囿愷樂在鎬鹿鳴四牡
皇華棠棣之歌伐木採薇出車杖杜之讌皆詠志摘藻
廣命羣臣上與日月爭光下與鐘石比韻事同觀海義
等窺天觀之而不測遊之而不知者矣竊惟左史記言
右史記事君舉必書無論大小况乎感而後思思而後
積積而後滿滿而後言若斯而已哉謹因事立名隨源
編次

內典序

尚矣哉羣生之始也義隱三藏之外事非二乘所窺自
並識同奔隨緣受業人天異軌翺動殊貫苦樂翻回愚
智相襲莫不宅火輪驚擬燄颺遷以寸陰之短晷馳永
劫之延路精靈起伏萬緒千名如來發源恒品蓋亦含
生之一至於並首爭馳斯固未或異也至於覆簣無始
之初成功斷籌之末塗遙業遠妙軫遐長累明積慧靈
覺獨曉巨相四八照曜於大千尊法二九包籠乎無外
六度之業既深十方之功自遠濟物以權降魔匪力妙

法輪轉甘露啓霏舟輿六趣津梁五道登四衢之長陌
遊一乘之廣路斯既已事盈方等義滿神宣逮於大權
協化對揚宗極徇物兆於慈悲亡身著乎非已行符四
等道昇十地若乃靈性特達得自懷抱神功妙力無待
學成孤策獨鶩莫知所限結習紛綸一隨理悟又有捐
情屏慮身心靡欲厭生死之長勤眷寂滅而投軫遙然
自得漏累煙銷且津心適道功非一業雖會理共源而
萌情或異是故高心邈行分路同趨忘懷屏欲殊塗一

致或草礫身體投骸林澤內忘形相外馴兕虎或坐卧
行立迹不違衆禪業定門造次無爽安忍與金石同固
戒行與寶珠等色雖秋禽年至春鮪時登而耿介長蔬
忡怛在念妙迹匪遐神塗密邇有悟必通由之斯至故
能藉智探虛乘心照理區區懷抱融然靡執俱處三界
獨與神遊包括四天卷舒萬劫聞片議而陟道場受一
言而升彼岸長夜未開心闕自曉淹迴聖迹寢息神光
既負橐以從師亦棲林以綜業足蹈慧門學通龍藏妙

吼遐徹鸞音自遠若夫又跪運心期誠匪迹而導達神
功照啓未悟唱說之美義兼在斯暨九土殊風八方舛
俗遊化所包事出弘獎皆足以遷光淨域登儀寶地並
黜華剪飾破愛辭親鼓柅無生之流方軌俗表之路固
已千佛摩頂七住齊功至夫清信士女植緣曠劫雖復
容服未改而戒德內弘瞻毗耶而聳轡望波斯而迴軫
駕四禪之眇眇汎八解之悠悠若乃十號尊崇三達靡
礙雖法身非有而常住在躬能仁權迹四門既非悟道

之始假滅雙樹寧有新盡之窮而天人瞻慕髣髴興情
雕金範玉圖容寫狀靈儀炫日寶刹臨雲或役鬼神之
功或資髓腦之力製非人匠寶以合成莫不龍章八彩
瓊華九色至乃齒髮傳靈衣履遺證聖迹彪炳日煥於
閭浮神光陸離星繁於淨刹若乃乘此直心推誠闇往
則半息可追一念斯至感降參差雲霏霧委此又昭被
象譯輝映縑圖夫秉牘書事其流已遠蓋所以彪著往
迹煥述遐聲雖篆籀異文胡華舛則至于叶暢心靈抑

揚訓義固亦內外同規人神一揆墳典丘索域中之史
策本起下生方外之紀傳統而為言未始或異也而經
記繁廣條流舛散一事始末表理卷分或詞義離斷或
文字互出甫涉後條已昧前覽尋源討流未知攸適雖
精理瑩心止乎句偈而初悟始學致惑者多且中外羣
聖咸載訓典雖教有殊門而理無異趣故真俗兩書遞
相扶獎孔發其端釋窮其致撤網去網仁惠斯在變民
遷俗宜以漸至精粗抑引各有由然是故曲辨精靈棲

心妙典伏膺空有之說博綜兼忘之書該括羣流集成
茲典事以例分義隨理合功約悟廣莫尚於斯可以理
求證成妙果若乃載司南之車猶稱靡惑服四照之草
得用不迷況乎六馬同鑣萬流共貫日月經天方斯未
已河海帶地夫豈足云蓋人道之筌蹄羣生有悟於此
也

佛記序

含靈萬品既非記牒所窮物物稟生豈伊積塵能計莫

不起乎無理而至乎無生者也雖要終有地而原始莫
聞自非靈照特達宗極斯在則理閉機初鑽叩事絕非
唯四果不議固亦十地罔窺邈乎悠遠有之而莫知所
從者也如來覆篲爰始言登永路起滅迴還馳驟不息
去來五道大千比之毫端往復三界祇劫未足稱遠積
明累照念念不休離此生滅證成妙果固已空有兼謝
豈徒齊遷魯變而已哉是吳區區猶秉何言之稱至人
無已寧以詞義為珍蓋由萬感相扇昧明代起業假緣

關事須曉達一音所吐無思不服義在徇物動非為已
法吼震灑於無外甘露炳煥於龍宮開宗闡教致之有
漸標四諦於鹿園辨百非於雙樹廓不二之法門廣一
乘之長陌行迷復路弱喪知歸而因應回舛厥塗不一
白毫所照遍刹土於恒沙七步降踐壅龍堆而攸被推
極神道原本心靈感之所召跨無邊而咫尺緣之所乖
面法城而不覩及像教云末經紀東流熱坂艱長塞山
峻阻橫書左字累萬方通剪葉成文重譯未曉自此迄

今千祀過半靈迹稍啓名僧間出律藏方等行來漸至
蘊乎西國未至者多雖法身常住之奧遠二諦三假之
淵曠悟道求宗於斯可足而能仁體茲大聖寔為本師
悠悠羣品精靈所係迄于前因往業多所昧略然神化
應感參差互見又世胄名氏本國俗緣散析衆部卒難
討究神功妙力同出異名降胎求道寧止一相託生迦
維本由權迹出自北門非悟法之始遍照東方豈通化
之極適道已來四十九載妙應事多宜加總緝共成區

吟至於經像舊錄境刹遺記開勸之功於斯自遠大權
弘曠亡身以濟物應真耿介標心非為已分蹤或異適
未必同神塗詭互難以臆辨靈怪倜儻言語斯絕圖澄
之龍見趙魏羅什之鳳集闕輔捷陀近遊京洛單開遠
適羅浮雖迹與俗同而意無可察塗出玉門法座不遠
七處九會峨然在目靈應肸蠁徧富延澤以西光景歲
幾多見天山之表有志奇僧每經遊歷神迹昭然咸有
文注繁蕪舛雜實須裁整分五道于人天設重牢于厚

地各隨業力的焉不差此皆卷舒真俗終始名相其立
塗幽遠大則直至道場其徵證切近小則開勸晚學斯
寔兼濟之方舟大悲之廣路雖復智昏視肉形窮尺捶
緣動必應又況進于此者乎是以至聖慤懃每存汲引
垂文見意貽厥將來皇帝行成無始道承曠劫十號在
躬三達靡礙屈茲妙有同此轉輪傷昏愍惑久迷正路
悵發之徒空懷鑽仰條流緬曠事難總一志淺業勞迄
用無就非所以闢彼四衢出之火宅者也乃詔中書侍

郎虞闡太子洗馬劉溉後軍記室周捨博尋經藏搜採
註說條別流分各以類附日少功多可用譬此名曰佛
記凡三十篇其有感應之流事類相似止取其一餘悉
不書或後死而更生陳說經見事涉杳冥取驗無所亦
皆靡載同之闕疑或憑人以言託想成夢尤難信曉一
無所錄若夫欲遐適者必遠記所從欲悟道者必妙識
所宗然後能允得其門親承音旨未有不知厥路莫辨
伊人膠目闇踐自與理合所以引彼衆流歸之一源可

令莘莘含識望塗知往案砥矢而言歸不迴遑於岐路
俾厥清信之士亦有取於此云

約進啓云佛記序今謹
以上呈詞義無取伏懷


自慙
謹啓

慕品序

奕之時義大矣哉體希微之趣含奇正之情靜則合道
動必適變若夫入神造極之靈經武緯文之德故可與
和樂等妙上藝齊工支公以為手談王生謂之坐隱是
以漢魏名賢高品間出晉宋盛士逸思爭流雖復理生

於數研求之所不能涉義出乎幾爻象未之或盡聖上
聽朝之餘因日之暇迴景紆情降臨小道以為凝神之
性難限入玄之致不窮今撰錄名氏隨品詳書俾粹理
深情永垂芳於來葉

漢魏六朝百三家集卷八十七上



總校官庶吉士臣侍朝

校對官檢討臣王坦修

謄錄監生臣張承恩